

香蘇山館詩集

香蘇山館古體詩鈔卷十四

東鄉 吳嵩梁 蘭雪

題光祿蔣丹林先生釣游圖

意釣不在魚閒行愛春渚落花盪風漪游鱗明可數

紫禁有滄洲

紫禁滄洲光祿署額

白雲無舊侶

用自題詩意

夢入郎官

湖投竿定何處

蓬島涵

恩波璧池漾晴影一笑攜佳兒曾踏金鰲

頂

先生官祭酒笙歌以殿撰行釋菜禮天下榮之

我從沂水游春風舊能領童

冠歸可偕石谿有漁艇

顧南雅同年六十初度

庚申造秋榜人才天下盛外臺領封圻中朝筦文柄先生講學人出處常澹定通籍事

兩朝一室祗懸磬著書方自娛居貧非所病道心湛若虛風力老逾勁岩桂揚高芬澗松懷本性遐哉冰雪姿豈與桃李競

往者持使節督學臨滇中百蠻被教澤三年藉磨礪君言造士法所貴非雕蟲先求踐履篤繼以經術充蒼山植吾筆洱海盪吾胸得力在深造吐氣爲清雄龍潭載酒地唐梅花映空至今門下士歲歲懷春風翰林職文字君獨勤諫諷越分罪且褫謫官

恩已重邊才資范韓公望屬姚宋病身雖暫閒讜言已  
先用蓬萊歲月寬風雨浩歌縱報稱多未能心骨有餘  
痛遲暮一士嗟憂樂天下共薦賢今何人朝陽此鳴鳳  
與君同鄉舉倏忽廿四年銘心以道義詎因時地遷我  
少君一歲鬢髮白已先經世愧無具自立苦未堅今夏  
病瀕死意外灰再然感君贈良箴百累勇一蠲橫流念  
滄海安身惟釣船故山可投老飲水甘癯仙

南雅得余詩讀至報稱多未能心骨有餘痛爲之  
流涕手書見答推挹逾分然其中多名論不可  
廢也因賦此篇義取交勗兼示覺翁石士屬同

和焉

論詩與取友皆貴有真氣但矜鴻博才究非切磋義吾  
儕爲石交不獨以文字抗懷希古人隱憂及時事國家  
與人材盛衰關進退芻蕘苟見收何敢論榮悴孤立雖  
寡援

聖朝不終棄所懼精力衰報

恩遂無地我嗟聞道晚攻詩但餘技偶然寫骯髒詎云  
有關係昨爲介雅詩聊以達吾意相感何獨深愴惻至  
流涕古今稱詩家鼎鼎千百輩一家能幾篇沉痛入肝  
肺君於鄙人詩未免有偏嗜卓識出曠觀其言不容廢

平生寸効無空文  
滋內愧三復君手書  
使我汗浹背  
病馬懷遠心  
老鶴發哀唳  
晚節願自持  
毋爲良友累

桂舫先生以失察里吏議蒙

恩命往

東陵效力賦詩恭紀

儒者樹名節  
立朝山不移  
身心苟無愧  
斧鑕何足辭  
庶司有不飭  
明鑒或偶遺  
堂堂司寇公  
何可干以私  
側聞對簿日  
理直而氣夷  
誣者大慙慙  
聽者咸嗟咨  
盛代無沉冤

皇天有至慈  
卒蒙

日月照保此冰霜姿公心已共喻公力未盡衰感  
恩願圖報始終爲臯夔賤子局外身一官冗且卑聞公  
望吏議寢食爲不怕公今荷昭雪破涕陳此詩上頌  
天子聖下紓吾道悲

蓮花風蘭篇

有序

吾友黎君廉鄉宰大同有貞女張氏生四齡鬻  
于曲中呂媼年十五艷傾一郡媼以爲奇貨可  
居矣女持志節甚堅無以自脫聞鄰婦竊言其  
母兄所在乘間逸歸媼欲強劫之共質於庭君  
爲判定擇配懷仁史生元勳年十八負俊才甫

入縣學遂以歸之予因爲賦此篇

蓮花出污泥不染清淨根風蘭寄喬松其香遠益聞紫  
蹇有名姝四齡離襁褓今日掌中珠昔年路旁草愛惜  
亦何爲念此傾城姿百萬錦纏頭能邀游俠兒紅潮迴  
臉波青山掃眉嫵流光正徘徊明月當三五草草鴛鴦  
社深深鸚鵡籠生愁行暮雨敢望嫁東風兒貌嬌于花  
兒心苦于藥有身難自持微生甘決絕竊聞鄰婦言兒  
家母故存瞰亡逃火宅間道叩柴門門開兒驟入驚疑  
惟掩泣空箱閉置難破壁搜求急里閤各喧爭牽連到  
訟庭不辭露顏色但乞保堅貞生養各言恩嗚咽淚相



續兒生不自知兒死終毋辱吠影復含沙庭前雀鼠譁  
誰求無價寶誰護未開花堂下動如烟堂上清於水一  
笑解重圍人天大歡喜男生願有妃女生願有歸梁須  
求孟匹鳳豈逐鴉飛苧蘿浣紗人桃李公門樹官爲締  
良緣人皆艷奇遇春草欄衫色春風裙袂香花飄連理  
帶雲擁合歡牀調羹妾所諳畫荻郎須記願郎登玉堂  
一酬孀母志綵服雙雙拜名香日日熏先求絲五色繡  
像事神君

讀蘭鯨錄寄吳巢松侍講

昌黎雄於文其詩獨排鼻廬陵變化之神似不以貌東

野格謹嚴聖俞境幽峭持以匹韓歐似難繼高蹈並時  
俱見推至欲薦郊廟愛才篤窮交譚藝貴深造遂以孤  
賞心徧爲天下告吾宗曠世才盛名綺年噪館閣重燕  
許壇坫壓庾鮑當其構思始沉默若垂釣燈青山鼠墮  
月黑寒蛩叫光忽雷電掣氣先風雨到四溟水怒立五  
嶽天動搖是由根柢深并擅鑪錘妙乾坤歸蕩滌古今  
困陵暴我詩未成家何敢與君較苦吟四十年鏤冰惟  
自笑譬策游山筇亦擬兼曠輿絕礪俯澄泉懸厓仰飛  
瀑一拍洪厓肩飄然越蓬嶠始知慕霞舉終憂陷泥淖  
君乃不遐棄長歌爲傾倒獎借及古人翻疑出阿好僂

指念同社針磁相感召彭子潛虬姿甘郭生饑鳳嘯頻

頻

前茅與後勁堂堂樹旗纛以我參其間詎免一軍譟孟  
明敗歸秦廉頗思用趙老矣心未灰傷哉髮先縞昨病  
且瀕死倖存非所料形骸留半枯神光斂餘照萬緣井  
不波一絲塵未掃謂此數寸書平生精力耗卽不望流  
傳何忍付摧燒君今主文柄玉尺謹衡校

九重眷清節多士被風教餘事領騷雅本原出忠孝行  
膺

不次擢密勿贊

謨誥大梁況名都山川足憑弔河聲壯汴州嵐翠潑嵩

少繁臺歌吹沉廢苑鶯花繞誰繼岑杜游前有鄒枚導  
君于按部歸從容恣吟眺巨響發黃鐘一洗等琶開儻  
念飯顚身許以俸錢犒爲我謀棗梨庶用慰昏耄海內  
豈不寬生才幾雄鷲成就嗟孔艱沉埋益堪悼天遠賦  
停雲江寒夢歸櫂感激涕盈襟千秋託同調

蔣母盛太孺人貞節詩

嫡庶分雖殊事夫理則同黽勉四十年志節完初終盛  
顏謝桃李苦心抱冰蘂八口廚中烟十指針上血廉吏  
歸無家孤雛倚爲命荻字灰未寒松身老逾勁生殫教  
育力沒賴兒孫賢我媿竹林友一賡霜哺篇

八月十六日踏月至懺園訪守拙道人

逸興發良夜踏月成幽尋懺園在鄰巷杳若山與林千  
章聳奇樹四圍合濃陰仰視天宇曠遂忘人境深賃廡  
有高士兀坐方淺斟意外展良覲邀我同登臨崎嶇度  
石礪窮窅懷烟岑孤亭攬羣峭萬影涵蕭森當年此休  
沐讌集皆朝簪清尊華燭地枯草寒蛩吟嘉植幸無恙  
斧柯誰見侵盛衰亦常理俯仰難爲心著書吾已老行  
樂當自今浩歌且達旦風露從霑襟

送鄧嶰筠同年按察陝西

外臺飭風紀其體嚴且尊廉平在考察仁恕爲本根君

以經術貴玉尺才早掄周召繼分陝申韓陋專門昔以  
二千石秉臬而開藩六條旣克舉一眚良可原薄謫遂  
光復終始邀

殊恩側聞陞辭曰感涕難爲言鎬京況舊游遺愛棠陰  
存華岳銷霽雪潼關開曉暎民情豈盡厚吏治豈盡悖  
執法縱明允未若清其源羣牧皆飲冰一夫無覆盆庶  
幾答

高厚長以宜子孫嗟我髮早白歸夢惟江村進退愧何  
補榮悴非所論封圻望君屬名節久益敦願持素心語  
寄伯華堂樽

唐貫休羅漢渡海圖爲介侯作

貫公擅三絕慧業皆前因夢中見諸佛以畫傳其真

語見

益州名畫錄

我嘗誦公詩奇險出清新草書逼懷素筆勢迴

千鈞此畫觀尤罕六法妙畢臻雄偉盡殊態靜慈乃入神吾子儒者宗學道能愛人豈借龍象力援此飢溺民度世我何術所憂非賤貧茫茫萬頃波渺渺一粟身安得青蓮花馭之爲車輪赤腳踏大海百怪無不馴

鄭少谷先生自書詩墨蹟爲陳望坡司寇作

腕力如龍筆不知先生兀坐方吟詩千秋大節在忠讜

世人但賞瓊琚詞

用山谷句

卽以詩論亦奇傑李何而後能

特立閩南並時十才子盛名斷推公第一天下幾人宗  
少陵多以槎枒爲杜骨獨將孤憤騁雄才其音蒼涼氣  
沉鬱奈何論者失苦心動言時地殊古今樂事未陳聲  
淚下頗疑無病先呻吟嗚呼知人貴論世豈可雌黃任  
吾意洛陽年少遭漢文厝火積薪尙流涕武宗失德尤  
非常內外寵嬖多淫荒已增護衛資藩鎮何至兵權付  
豹房文成功幸子儀匹祿山禍已宸濠當臣與拾遺同  
偃蹇民如天寶半流亡翠輦南巡傳詔切先生抗疏排  
天闕雷霆怒擊白晝昏杖底腥風階下血金鰲峰北舊  
林亭初志猶期天下清再出誰知無寸補一官何忍負



香蘇山館詩集卷十四

八

平生武夷九曲佳山水憂患餘生惟戀此歲暮清游竟  
絕糧風雪還家甘餓死死後何人與庇棺似聞遺稿半  
叢殘門生賴有高偕傳抱向空山掩淚看用遺山句孝陵夜  
哭山河改手澤依然煥精采塵網蛛絲字數行鑑藏未  
許千金買我識尙書非好奇文章風槩藉扶持鬼神呵  
護吟魂出四十年前初見時

次韻答郭頻伽

論交三十年同心而異迹我方厭塵瑳君已枕泉石悠  
悠身外雲湛湛胸中月飄然兩禿翁賸此一枝筆趙女  
矜繁等楚人泣良璧焉用千載名堅與百憂敵苦吟飯

顥翁渴病文園客光芒恨太多棗梨共奇厄哀絃況中  
摧孤燈亦騷屑願君且達觀身爲吾道惜雪天春漸迴  
江梅悟消息

陸虹江比部石門觀瀑圖

上潭飛流挂天壁青天界破白雲白天壁灑落歸下潭  
吹雪吹烟無定質兩潭之水八百尺萬古奔雷鬪奇石  
其外潺湲匯眾谿幽花古樹誰能識神仙洞室君所宅  
人海無端感遷謫有山怒飛水爭立讀畫依然盪魂魄  
雁宕龍湫聞更奇惜哉未躡謝公屐爲君長嘯凌天風  
請借銀河洗吾筆

張芥航河督願遊圖

西湖泛艇第一圖

君願游西湖寫作圖第一西湖之水清徹底夾岸青山  
俱倒入我游此湖三十年吹笛時時泛畫船外湖空闊  
月如水裏湖窈窕花成煙冷泉亭下韜光路偏愛綠天  
最深處遙分海色近江湖中隔吳山幾層樹九谿十八  
澗淙潺都在明漪積翠間願君他日移仙櫂蠟屐徧游  
湖上山

廬山觀瀑第二圖

君願游廬山寫作圖第二廬山瀑布天下奇快哉請述

開先寺青玉峽口雷雨風黃巖壁立天當中萬丈不銷  
太古雪五色照作經天虹我曾探源陟其頂腳底飛出  
雙白龍下瞰彭蠡勺水耳吳楚一氣青濛濛匡君今別  
十三載夢踏天池看雲海願君持節臨吾鄉五老雲中  
先把臂

雁宕探奇第三圖

君願游雁宕寫作圖第三康樂游屐未經處故人先我

窮幽探

謝慈山李石  
農雨中丞

山根突兀連滄海亘古崩濤不能

壞一峯一朵妙蓮花峯峯奇拔青天外龍湫瀑又廬山  
殊萬馬踏陣雷迴車飛花濺雪徧林壑山下仰觀烟有

無蘇潭石農去已久俊游君繼中丞後我欲從君君許  
否現身願化聽詩叟峯名

黃山看雲第四圖

君願游黃山寫作圖第四洪厓有約我未踐

維存編修

此是

平生卧游地天都峻絕第一峯三十六峯皆附庸雲氣  
滃然化爲海出沒萬態難爲容雲來天地同一白雲去  
青山依舊色奇石崢嶸虎脊高長松偃卧龍身側浮生  
富貴等雲烟君愛游山骨已仙古寺慈光能借榻解衣  
同願浴湯泉

南武奉祠圖爲李丈硯雲作

吾師藏園

蔣心餘先生

有遺詩得爲循吏死亦足匡時大畧

鬱懷抱但以文章寄歌哭吾父作吏三十年所至皆爲

民造福有子不能表先德一傳蘇齋誰采錄

翁覃谿先生爲撰家

傳

李侯善政今所無能與百姓同憂愉桐鄉俎豆身後

祀渤海治化生前孚當其捧檄來三吳賑災不惜身泥

塗考覈金穀嚴吏胥所司焉敢爲侵漁高淳縣郭瀕三

湖東壩一設水下瀦教之蓄洩積患蘇催科弗擾民爭

輸新陽舊稱繁劇地案牘爲山訟成市侯以廉威斥舞

文剖決如流事無滯保甲初行觀望多約法簡明條十

二諭民詩就三十章誦者至今猶感涕大府議濬吳淞

江侯爲區畫精且詳楊柳結屋荷花鄉撤其壅塞波洋洋巴城湖水連和塘灌漑所及田豐穰豪家欺隱不可當貧民逋賦多流亡經界旣正增溝防下戶從此除虛糧是年朱提價翔貴鄰邑加徵視爲例侯曰增易再減難何堪以此爲民累佐郡幾日移川沙侯治官事如其家竈戶雖貧幸蒙卹營兵昔橫今毋譁海潮出沒靡津涯盜艇往往充漁槎法嚴互保禁浮宿蛟鰐斂尾鯨摧牙江南治行侯稱首講學尤期風俗厚侯身未老心先枯天奪慈君祇中壽平生著述皆經猷積蘊何曾百一酬三江水利圖指掌一一利弊俱研求方今吳越多橫

流昏墊上煩

宵旰憂羣公疏濬爭上游經費人才資借籌導源輸委  
有成算侯皆未雨先綢繆當時若早用侯策國計可  
紓民病瘳侯恩惜未推四海侯志已足垂千秋承家況  
有兩雛鳳其才皆可爲時棟能昌彝訓贊鴻業庶令九  
京釋餘恫嗚呼丈夫經世有夙期志行豈論官崇卑著  
書萬言不一試吳生老矣今何爲身填溝壑百無恨所  
媿傳經吾父師瀧岡墓表復待誰展讀此卷心苦悲願  
將柳子迎神曲一灑羊公墮淚碑

金陵貞孝張女詩



生爲張氏女聘作錢家婦阿壻音信無願侍翁與母阿  
翁好遠游數年纔一歸母飢爲進食母寒爲製衣阿兄  
生一兒阿嫂病不起善體翁母心撫若親生子兒小出  
天花性命在呼吸卧榻藥烟中經旬淚痕涇兒年漸長  
成課之使讀書風雪夜三更一燈搖徹廬承歡四十年  
足不踰門闕戚黨知女賢無由望顏色願爲女貞樹不  
開連理花冰霜完苦節詩禮出名家峩峩鍾山雲湛湛  
青谿水山水揚清風表此貞孝里錢家有此婦錢郎死  
亦生張氏有此女千秋貽令名

桂舫尙書以詩集屬爲校勘再書其後

先生勲望天下知先生道力堅自持黃鐘大呂絃朱絲  
斂手請誦先生詩先生詩法老杜追一字落紙千鑪錘  
海水壁立山怒飛遂以變化爲雄奇卅年臺省兼封圻  
雷雨經綸冰雪姿一里吏議官暫移始終大節無磷緇  
五陵蔥鬱近

帝畿躬執耒耨甘塗泥感

恩宣力力未衰嚮用佇荷

皇天慈蘭闕南北山四圍霜葉萬樹紅參差芒鞋一雙  
筇一枝道心所涉忘險夷別來新句昨兒貽胸中元氣  
猶淋漓上頌

堯舜下龍夔但有忠愛無怨誹命我吹毛索累疵用意  
刻苦詞謙卑我嗟鈍根聞道遲心枯才盡何能爲先生  
所重不在詩卽以詩論堪吾師酬知無地獻所疑附託  
願與千秋期

見遠山房法帖歌爲涂松門作

涂子書名徧吳越徑攜石墨游燕臺龍跳虎卧一枝筆  
腕力能運千鈞迴長安車塵漲成海唐花得氣爭先開  
可憐俗書喜姿媚遂令駿骨疑駑駘六藝之精進乎道  
隨人作計終優俳以此論書兼取友肯謁朝貴心顏摧  
自言此行不孤負顧南雅吳何宰相追陪子美昌黎不世

出貺我隻字皆瓊瑰嗚呼翰林信奇傑能以正氣扶人  
才我無學術可經世卽工造句何爲哉行年六十老且  
病平生熱血寒于灰摩挲妙跡發奇賞七字瘦硬盤空  
來願貯行牋莫輕展虛堂白晝生風雷

李蘭卿侍讀出守思恩賦此爲餞

田州迢遙九千里五馬衝寒明日始君官恰領三台山  
我心已渡三潮水閩中才子今謫仙及第花開歸娶年  
江國持衡文運早樞廷給札制詞專一麾出守人  
爭惜位業雖高地窮僻板輿就養來京朝手挽征衣留  
不得君行念此久踟躕戀闕心增繞膝初我陳大義勸

樽酒請消離緒爲歡愉賢母生兒期報國豈爲封侯辭  
絕域玉堂清暇奉晨昏況有哲兄分子職江山風土爭  
雄奇八寨中兼十二司非以廉威結恩信詎能坐鎮安  
邊陲此是陽明戡定地蒼苔親剔磨厓字百蠻耕鑿報  
清時一代封疆需重寄忠孝平生自許深從知幹濟出  
儒林起居八座移旌節天鑒春暉寸草心

題蠻司負弩圖送李蘭卿太守出都

紅水之江玉印山牙旗高捲邊塞閒宦游至此亦云壯  
況有威德馴諸蠻八仙屯寬五百里巢居夜泊瘴雲裏  
猺獠狔狝狎狼各以土官相助理其氣桀驚性貪鄙

忽然而怒忽然喜浪花跳月連婚姻椎髻銜刀入都市  
弩名偏架藥爲矢射人射虎皆立死太守今從天上來  
負以前驅乃如此君不見馬伏波破二女子功已多千  
秋銅柱銘嵯峨又不見王文成藤峽親提十萬兵剿撫  
兼用賊始平

聖朝到化被八荒馬人龍戶皆農桑籌邊底事開軍府  
造士先爲置講堂青精之飯都林酒桂海從茲風俗厚  
安輿行處萬花圍吹笙踏歌爲母壽

送潘芸閣學士觀察江南

讀書貴用世懷抱關蒼生達任天下重窮亦千載英揣

摩取科第積分爲公卿其心溺富貴所立非功名潘子  
善著述發以真性情踐履旣醕篤議論皆昌明往督粵  
西學校士嚴且清至今手栽樹春陰被榕城還朝專史  
局紀事詳以精典章表鉅麗義法歸深閎高文邀  
睿賞華資冠蓬瀛

恩重報無地感涕常縱橫

講官職論思文章本餘緒誰負揆天才能持經國計前  
年畿輔災君爲籌水利得失剖源流功可虞徐繼近聞  
高堰圯奔騰合淮泗黃河浪蹴天洪湖涸爲地當局豈  
無人苟安貽積悔君懷獻璞忠早上徙薪議借黃求濟

運河淤運先滯蓄清能制黃運泊河亦泊剝運行已遲  
未免增勞費憂在天下先卓哉公輔器

名臣應運出

殊恩非濫蒙擢官論資格所以寬凡

庸君受

特達知簡畀豈不崇封圻待專寄先使觀

民風江南財賦區物力資年豐連歲苦積潦中澤多哀  
鴻海運事方亟河餉憂未充培養苟無法曷以蘇疲癯  
君學有根柢才大用及鋒置之盤錯地利器增磨礪大  
吏況多賢集益須和衷君惟持定力夷險皆成功

春卉爭艷陽寒花媚幽獨人海豈不寬閉門卽空谷嗟  
我病且衰進退俱碌碌但歌杜老詩敢效賈生哭著書



知滿家晨夕就君讀論事通古今成敗若龜卜吾生亦  
何幸 禁廷見頗收恨不排九閭代奏三千牘君用能  
救時我歸願初服飼鶴田可求種梅心已足舊居懷比  
鄰餘芳被草木試尋蔗山園中有往來躅君著有畿輔水利四案惜未進呈嗣聞高堰漫口督府疏請借黃濟運上書力陳其弊且爲預籌剝運及運河淤阻始行此策勞費已多

李鳳岡太守生壙圖

世法如浮雲吾心一明月明月無古今浮雲自生滅奈  
何徇俗士不自葆其光萬物撓天君質存精已亡先生  
學道人自有真我在生死與眾同超然生死外亦復取  
高第亦復爲好官棄之如敝屣身閒天地寬清門多鳳

離故鄉有墳墓遣兒奉先祀卻寄春明住春明萬人海  
大隱朝市間築臺屋東隅日日臨西山西山來蜿蜒其  
氣妙融結左龍而右虎中有天然穴先生顧之笑樂哉  
惟茲邱吾以妥吾魄身外吾何求乃買二頃田乃蓋十  
椽屋墓門植松楸庭階藝花竹雪霽風始和四山花亂  
開吾死此埋骨吾生此啣杯一杯澆白雲一杯奠黃土  
一醉仰天卧萬花自飛舞坐中主與客非鬼亦非仙吾  
年稱最少霜雪俱盈顛先生愛我詩能道意中事自寫  
生壙圖屬我以詩紀嗚呼百年前此地無人知百年後  
來游我復知爲誰惟有壙中人千秋結心賞鶴背誦吾

詩青天自來往

題紅葉山房詩集兼寄哲弟鄭夢白觀察

眼光如炬膽如斗五十八篇詩脫手詠史須推義法嚴  
寓物俱關性情厚人才如此一第慳天意難爭中歲壽  
老泉同叔師友間偉哉東坡能不朽

吳生平昔卧游地富春江山水匡廬誰知筆力透紙背  
卻讓此老探驪珠子陵高節南宋繼

謂謝皋羽

逸少奇才東

晉無釣臺墨池寄臨眺千載不憂吾道孤

閣師蔣礪堂先生以十歲入泮時卷面浮籤裝潢  
成冊令門下士朱殿撰昌頤書同案諸公姓名

於後命題

國家設科第所以收人才童子雖小試已爲將相階郡  
縣歲登千百輩往往駑駘系騏驥萬里一蹴風雲生不  
記鹽車摧折地先生就塾纔四齡讀書聲若水瀉瓶十  
歲綴文老宿驚上庠初入誇奇英十八登賢書十九試  
金殿柯井劉亭簪筆多閩黔秦粵司衡徧今年拔士  
領春官玉尺精嚴鐵網寬誰知宰相掄才苦卻爲書生  
造命難東堂昨夜追陳跡燈火風簷太蕭瑟一紙浮簽  
五十秋金環夙世疑探出同學當時幾少年半歸宿草  
半華顛蓬山第一傳衣鉢泮水重教締墨緣先生相業

真霖雨卽論文章亦燕許不然富貴等雲烟何取姓名  
留寸楮雪泥鴻爪感前因傳示兒孫念苦辛請看黃閣  
調元手卽是青衫納卷人

南村耦耕圖爲鄧湘臯廣文作

壯游萬里窮海岳不及歸田有真樂論交天下皆名流  
不若弟兄同白頭村居況近資江邊江水分流足漑田  
一犁耕破黃牛地十畝春涵白鷺天君家昆仲老逾篤  
自比東坡與同叔負耒朝行南北阡挑燈夜對東西屋  
旅雁孤飛影暫斜昨隨計吏上公車爲聽懷遠連床雨  
不種河陽滿縣花我亦有兄相念切不堪早歲連枝折

桐樹親栽已插天書窗斷夢同淒烟憂患平生識字多  
隨身猶有舊青蓑歸去課兒從學稼力田孝弟本同科  
李海帆太守釣鼈圖卽送之官永州

長風萬里吹鯁壑先生俯視惟一勺靈鼈首戴三神山  
先生收取惟一竿先生之才大於海先生之心細於絲  
一誠所貫萬怪伏乃以平易爲神奇仁義爲鈎禮爲餌  
釣術居然通泊理雄文能祭鱷移家勞民忍賦魴蘋尾  
東西瀾水饜餘腥又拂長竿入洞庭九疑月滿張仙樂  
知有魚龍改浪聽

宋正鸞觀察由湖北督糧入 覲出其別後詩

見示卽送出都

君理岳陽櫂湖天浮洞庭七十二峯吐華月照見湘娥  
眉黛青君陟飛雲岩再躡牟珠洞洞泉滴水水爲冰雲  
氣浮山山欲動巴蜀送君持使節青天入峽江出峽惜  
哉佳句散如烟一麾萬里今十年滇南詩境尤瑰奇洱  
海怒濤天半飛點蒼山積太古雪一雪暫消雲補之龍  
潭花發唐梅樹香入人天無覓處定光寺裏紅山茶雷  
火燒空十丈花看花君載千壺酒醉膽輪囷大於斗萬  
古茫茫兩謫仙太白子瞻誰抗手大別山高江漢迴樓  
頭黃鶴忽飛來看君一笑揮椽筆撐拄乾坤要此才

虛谷草堂圖爲故博山令武公作

圖爲黃小松畫  
覃谿師有詩

虛谷草堂吾未到虛谷之名吾早知手披此卷卽良覲  
秋影庵畫蘇齋詩庵中鑑藏富金石秦鏡漢碑多創獲  
吾師博學曠代無百家貫串皆經腴與君定交持古誼  
妙以文章通吏治何爲置君石屋中晏坐空山無一事  
我知此畫非求似數筆蒼然有元氣白雲吐納在軒窗  
洞天已隔人間世黃君他日款柴關疑到洞庭林屋間  
語見小松跋中龍威異書肯借讀閉門何地非仙山我昔負笈  
來山東壯游曾陟日觀峰作圖亦復煩小松尺幅萬里  
與此同

乾隆癸丑同覃谿師登東嶽小松爲作岱雲會合圖

始知一虛涵取有上



善若谷聞李叟不見山中著述人當官有才兼有守

洛陽董宣強項吏執主蒼頭刀畫地謝游何者稱大儒  
鑄令乃煩馮翊書讀書萬卷善稽古官不救民儒亦腐  
博山賢令偃師武下車先問民疾苦獄訟廉明學校興  
畏若神明愛慈母何來悍役十一人奉牒自稱丞相府  
鐵尺縱橫飲博場蹂躪民間暴於虎令曰法在誰貸汝  
手擲銀鐺縛如鼠杖血淋漓階下土權相心啣大吏忤  
彈章朝入夕解組百姓攀轅淚如雨冰山一敗清議聞  
疆直聲名動

帝聞徵書纔下君九原身未及用道已尊嗚呼身未及

用道已尊，治譜猶能貽子孫。不然名士畫餅耳，著書雖多何足論。

送韓桂舫司寇移疾歸長洲

宦海起伏爲波濤，此身萬仞山壁立。不邀天地

覆載恩，進退豈知公大節。公爲司寇歷

三朝，斷獄引經推第一。薄管幾成無妄災，

聖主矜全終破格。前年公赴蘭闕，謫送者臨歧多太息。

去年內召復公官，朝野歡聲動顏色。自矢捐糜答

高厚，翻以憂勞增疾。昨聞公上乞假書，自述遭逢

淚霑臆。

詔許還山就醫藥，全家悲喜心交集。公由

郎署陟封圻中外宣勤皆報國鯨魚波靖服威名駟馬  
門高多隱德侍膳曾開晝錦堂栽花預卜平泉宅十載  
雲歸戀闕遲一帆風定家山泊公於富貴若浮雲自  
信平生惟道力年未懸車已乞身清議當爲天下惜

我從公游三十載竊以文字爲因緣公進我未頌功德

公退我益心纏綿公有哲兄

謂聽秋  
孝廉

我石友唱和屢出

登臨篇公於壁間賞佳句朗吟擊節卿相前是時吳下

盛文藻壇坫首推嘉定錢

辛楣  
先生

袁王吳趙接高會

簡齋  
西莊

夢樓穀人  
顧北諸公

我衣慘綠方少年湖山佳處共沈醉靈岩杖

屐桐橋船風襟一判隔生死在者霜雪皆盈顛公所建

自在天下我惟老病依殘編冷宦浮沈乏寸補江鄉欲

返嗟無田公今浩然投紱去鹿門偕老眞神仙梧桐蕭

瑟秋夜雨對床竟就東坡眠故家喬木青插天游山載

酒多名賢

謂潘格臯丈及芝軒尚書吳玉松翁及藹人學士

滄浪亭子肯招隱

風月應賒四萬錢

歐公寄蘇子美滄浪亭詩清風明月本無價可惜只賣四萬錢

六月二十一日歐陽文忠公生辰用公題滁州醉

翁亭韻同顧南雅張覺菴編修陳石士講學錢

衍石侍御張詩舫舍人李海帆太守姚石甫大

令作

四十稱醉翁不聞自壽篇今日一瓣香上溯嶽降年翁

時守滁州跌宕林壑間浩歌出亭際車馬留山前

用公游瑯

琊山

愛此釀泉水天籟鳴涓涓座客有杜彬答以琵琶

絃爲政自有體一簡御百繁其樂與眾同醉卧聆潺湲  
我欲畫此意妙手誰龍眠朝夕拜公像千秋如晤言想  
見酒醒處日落山蒼然

醉翁以名亭留題賦新篇緬懷宋慶厯丙戌同六年豐  
樂別有亭翁亦醉其間記成當此月傳觀壽樽前平生  
忠愛心報國輸微涓地僻身暫閒且復調朱絃魚鳥久  
益親花木陰漸繁千峰翠漠漠萬壑風浚浚其心以憂  
醉安得枕石眠高懷各有適白雲聞公言我亦念早歸

華髮今蕭然

心以憂醉安知樂高懷所得各有適見贈沈遵詩

次韻醉翁亭詩既成意有未盡復作一首卽題東

坡書公記捐本後

慶厯六年歲丙戌先生始自稱醉翁一笑頽然聊戲客  
行年四十非龍鍾環滁積翠山千重琅琊秀壓西南峰  
峰迴路轉一亭出釀泉赴壑流淙淙公來泉上飲必醉  
民洎事簡年屢豐自言寄托在山水實以清靜蘇疲癯  
是年豐樂亭並建二記前後相爲工東坡書此勒崖壁  
洞口常有歸雲封幽谷緋桃荇溪石此外約畧尋游蹤  
好事況有沈夫子妙以公意傳絲桐太古之音無盡水

寫入青天華月中明年平山盛文譙荷花影漾金尊紅  
 潁州西湖又移櫂坐收萬頃玻璃風平生大節孝且忠  
 蔣彭何物能撼公更廿五年乞歸農君恩畢竟完初終  
 我生丙戌今再逢余生於乾隆丙戌年逾六十真衰慵病若聖  
 俞幸賒死虛名妄託因詩窮梅公以甲申病疫卒於林京師年甫五十有九  
 泉之好久逾篤精誠所結疑可通盤輿插花歸酩酊卧  
 游願與滁人同

旌表貞烈馮姑詩姑名秀瓊蒼梧人幼字羅文燦燦死願歸於羅不納姑泣曰吾志已決湘

君招我矣遂衣衰絰慟哭赴湘江死其祖父請旌於朝兄子志超孝廉為徵詩

馮女十七齡已字羅氏子鴛鴦不並飛願赴湘江死湘

江之水清且深惟有湘君知我心女生有淚無灑處斑竹蕭蕭風滿林

題賓谷丈廬山簡寂觀圖

時以讀純陽子海瓊子簡寂觀詩原唱見示故

有後  
二章

采真契元化抱朴先寡營烟霞妙供養亦足娛長生陸公秉高秀久謝軒冕榮濟時功豈卑學道願益宏廬山棲隱地茅屋纔數楹攝心超萬物御氣周八紘一朝持絳節飄然游玉清回視瀑雲裡浩浩惟松聲

曾子抱仙骨高風繼修靜日在塵囂中道力持愈勁簡以絕外勞寂以收內聽雲行山不知江流月常定平生



多壯游獨往愜幽勝鹿飲一溪香鶴唳四山應歸倩黃  
大癡寫此無人境冲舉未可知林泉適吾性

神仙混人間奇蹤苦難識往往失交臂悔恨終無益  
翁過此山淬劍有遺石開匣玉龍飛騰空去千尺當年  
侯用晦何緣獲親炙七字領微言遂望青城籍我來謁  
星壇洞天久岑寂丹井尚可尋寒泉湛虛碧

海瓊舊游地琪花多手栽編蒲寫長句噴薄爲風雷我  
昔拜真相九曲曾溯洄白雲守岩洞綠字搜塵埃夜半  
登中峯鐵笛龍吟哀前身忽省悟淚下沾古苔浮生厭  
諸苦出世惟仙才願踐讀書約頭白同歸來

海瓊子像  
在白雲洞

文集版藏止止菴余游武夷曾搜得之張鶴舫進士以扶鸞延呂祖降壇稱余爲鶴奴後身蓋海瓊小字也

### 題牛師竹觀察丈松陰課子圖

先生家世傳經術判事曾揮五花筆下直歸來聽讀書

花間雛鳳清聲出是時公子歲七周雙瞳剪水明於秋

誰知膝上王文度卽是江東孫仲謀賤子登堂年十八

乾隆癸卯梁與哲嗣次原約爲兄弟始拜公於邸第車笠論交最親洽未從鸞掖

授詞頭公爲內閣前輩先向鯉庭偷句法一官萬里轉監司海

嶽雲濤盡入詩勳名久已收滇楚堂構依然領度支次

已未成進士卽官戶部金馬迢迢趨絳闕草堂爲我留旌節酒酣

手拓綠沈槍老去籌邊心尙熱公由雲南入觀枉過寓齋且出所御銀鎗

見此圖寫照在青春謾謾松風如有神七字賡酬皆老

宿一門喬梓盡傳人學士年前提玉尺重來飽看蒼山

雪

次原前督雲南學政  
今官內閣侍講學士

紫薇又見發孫枝

賢孫伯玉繼  
復官舍人纔

信文章能報國一經我亦媿傳家三世論交鬢已華昨

見遺篇爲感涕冰綃捲送萬梅花

近得公所題孔雲谷  
梅花橫卷卽贈次原

匏安圖爲魯服齋觀察作

星河象應爲匏瓜繫而不食聖所嗟千金一壺占利涉

無用之用用益奢魯君自署義何取庵名豈欲追吾家

謂匏庵  
先生

君持文衡能薦士君冠獬豸能觸邪督糧出秉

外臺節利弊所至勤梳爬千艘啣尾給

天庾吏民無

擾軍無譁津門計日歸權近駕鵷舊侶尋京華自言才拙職難稱甘雨焉得隨吾車歲豐民湊幸無事香風四境聞連耒細烹苦菜有餘味願安老圃爲生涯吾儕期於物有濟自立先貴身無瑕君以清節樹偉績韓范位業非徒誇澈翁老矣百無用但以造句蒙褒嘉弦匏敢望協韶濩正聲未肯隨淫哇冷官自笑惟飲水故人暫聚真搏沙一尊且爲輕紅醉富貴浮生亦此花

是日觀牡丹於

陳石士齋中

顧南雅畫黑龍潭唐梅爲望坡尙書作

崇安縣古傳紅梅清獻手植花仍開滁州老梅尤可敬

醉翁此地曾觴詠唐梅種者知何人俯視宋樹皆耳孫  
黑龍潭深不可極前九百載蟠其根繁苞怒坼大於蓋  
艷雪一照無黃昏沙壹浣絮荒江濱古木曾現蒼龍身  
梅乎天矯亦龍化五朝呵護當有神尙書昔秉中丞節  
歲豐民和政無闕懸知此樹卽甘棠爭看穿花飛綵蝶  
公舊有蝶  
峯瑞蝶圖學士奉使三年還門牆桃李長追攀酒酣爲  
公縱奇筆萬里春風迴指間公謂此畫世希有乞君長  
句君許否要寫平生鐵石心須憑拄地撐天手野人性  
僻耽冷花見此肝肺生杈枒三十萬樹香九里夢踏月  
明尋釣槎

題潘芝軒少宰乾隆癸丑翰林同年雅集圖

玉堂風月人間無二十三君文讌俱天以名臣應

昌運羣仙領袖推東吳公主文衡徧中外以人事

君一德孚十年歸養望久重六曹出冠恩尤殊昨

持此卷命加墨懷人感舊增欷歔諸公相識我過半協

揆心傾未第初閣師英煦給諫已往司寇在爨桐肯惜

琴材枯謂鄉試座師王麓園先生會吾鄉三子分逾客

鍾溪同歲嗟早俎少司寇陳公與退齋已乘黃鶴去南豐

譚太守卒再司風紀惟春湖臨川李公葉魏相繼委旌

節琴柯中丞前撫粵西外臺存者陳與朱遠受太守林

下二叟幸猶健吾宗抱孫能自娛

蔡生甫學士此外晨吳玉松太守

星太寥落幾人墓草先荒蕪高義要期金石貫素心豈

爲升沈渝我生無分陟蓬島但看紅藥翻階除與公論

交愧三世昔也竹林

榕阜先生今鳳雛謂功甫昆仲

雲烟富貴等

飄瞥道德文章資楷模畫中見公尙年少微霜亦復飄

吟鬚願公秉鈞繼姚宋不獨造士兼歐蘇十七科尊大

前輩廿四考領唐中書瓊林重宴定無恙龍首簪花又

補圖

送梁茝隣由淮海道按察山東

先生治水如治民魚龍百怪皆能馴先生治民如治水

導其性情坊以禮隄能捍水潰亦多德能馭民民未和  
刑期無刑古有訓要以廉靜蠲繁苛齊魯況連畿輔地  
海山素擅魚鹽利錢穀勾稽有庶司挽迴風俗推循吏  
先生學以經術尊早爲政令清其源直將四海入懷抱  
肯令一物留煩冤側聞秉臬吳中暇猶有高情寄林榭  
新詩酬唱繼歐蘇明月清風美無價旌旗今蒞小滄浪  
萬點桃花春水香若向湖亭修禊事舊盟未許白鷗忘  
胡小東比部左右修竹圖

官領白雲司僊直入樞省語妙借司空畫此檀欒影自  
言家住龍眠山繞屋萬箇青琅玕烟月四時含窈窕風



泉終日瀉淙潺把臂當時許入林意行往往窮幽深一  
爲紫禁簪毫客孤負青山買宅心出處百年難預計  
要當磊落行吾意大隱由來在市朝山林豈必皆佳士  
小園新竹吾手栽翠雨蕭蕭撲檻來但使阮嵇能入座  
此君風味定無猜

次韻謝會賓谷丈題王元章梅花

探梅公愛青芝山來往銅坑元墓間結茅有願不能遂  
夢中一櫂風吹還十年我與桐君別臨水柴門掩花雪  
三十萬樹香徹天拄杖何人踏明月冰綃六尺空齋挂  
展圖重下梅顛拜前有花光後補之盛名都被山農蓋

當時傲骨輕侯王百折難回鐵石腸仙筆忽從天上落  
對花恨不飛千觴平生一瓣南豐香詩人幾輩容升堂  
富貴浮雲多幻態一笑且將身入畫此畫奇絕得公詩  
奇外誰能更出奇

六月初二日爲陳石士講學作

前年病起剛六十君詩賀我再生日謂天厚我昌其詩  
先以針砭銷痼疾萬緣參透心空明海立山飛留此筆  
齊名惟有鮑宮詹旗鼓中原並時出君今又屆周甲年  
玉堂介雅邀羣仙祝君位業陟台鼎佩黻偕老兒孫賢  
我謂此皆庸福耳富貴百年一彈指聲聞之壽世所稀

功德文章古無死君承襲訓有淵源小技雕蟲詎足論  
博綜許鄭研經久篤信程朱學道尊平生師事姬傳叟  
才法能兼性情厚以醕爲肆肆愈醕善用其言非墨守  
使節曾經江左來講堂舊蹟更低徊不因剖璞求良璧  
誰識焦桐有異才謂管之河嶽英靈原間氣名盛常遣鬼  
神忌才命如君兩不妨蓬瀛出入渾游戲覺翁昨已歸  
道山吾輩杖履猶人間荷香十里城南路且向花天縱  
酒還

題謝向亭學士遺照

致身當及時讀書期有用但習俳優文豈足廟堂貢君

負敏達才經史能博綜大計關

國家鑒古今亦洞時事方多難深慮

上聞壅萬言排

天間利弊頗深中顧公君所師清班同侍從批鱗臣分

舉謫官主恩重

南雅學士以奏留松湘浦總憲部議革職特旨降補編修

君不鑒

前車復以規爲頌惜哉志未酬九原抱餘痛

與君同冷宦蓬門掩蒼苔一朝持使節南嶽雲爲開前

年病瀕死返照光暫迴竊謂天意厚儲此有用才詎知

本根撥二豎終爲災鯨驂跨空去精魄猶往來嗟我老

且病身心皆死灰餘生雖苟延樹立安在哉君骨歸故

山遺書亂成堆公子慎藏弄攝取防風雷

韓樹屏侍郎三百三十有三士亭圖

八閩之士多英奇怪石亦負干霄姿以石爲贅士相見  
清風兩袖黃金賤此舉創者誰筍河朱夫子士皆入藥  
籠石亦感知已一士各攜一石來芙蓉闢盡蒼雲堆石  
背深鐫士某某姓名磊落同不朽朱夫子佳話傳弟兄  
持節相後先門牆玉筍青參天韓夫子來西蜀校士日  
坐友清軒暮靄朝嵐看不足亭下一池水明漪照我心  
亭前無數峰積翠霑我襟盈庭桃李春陰重況有清聲  
出雛鳳鐵網珊瑚瓊樹枝儲才俱爲天家用平生石友

感無多一別春風兩鬢皤展圖願下襄陽拜道義文章  
賴琢磨

香蘇山館古體詩鈔卷十四終

香蘇山館古體詩鈔卷十五

東鄉 吳嵩梁 蘭雪

澄懷園海棠初開祁春圃

傳藻

田季臯

嵩年

兩編

修留飲花下有作兼寄黃左田尚書

井西老人舊書屋嘉樹手栽多十年海棠一株豔尤絕  
花時觴詠邀羣仙我來看花花始圻萬點新紅嬌欲滴  
若教春睡玉環醒無此傾城好顏色翰林畱我花間住  
細翫奇姿浥風露瀕行折贈最繁枝胡蝶追飛入城去  
小園花信遲未探蓓蕾可憐纔二三卻意涪翁林下卧  
燕支吹雪徧江南



黃尊古長江萬里圖爲賓谷先生作

江聲滾滾來天上萬水千山卧游壯巨然去後此才稀  
妙以精深發雄宕懸厓束水江勢迴怒濤穿峽山爲開  
雲中城郭參差見樹杪帆檣厯亂來勳名百戰東流水  
割據英雄今已矣振古才名兩謫仙太白子瞻皆不死  
吳生年少百不憂江北江南許縱游會入金山登絕頂  
曾經采石泛扁舟黃鶴樓高臨大別吳楚青蒼在眉睫  
一笛梅花四十年江城話舊頭成雪會公才大尤不羈  
每逢名勝先題詩魚龍天矯騰波出風雨縱橫下筆時  
載書萬卷行萬里蹤跡平生多似此偕行惜未入峨岷

壇坫至今專子美巫峽瞿塘險逼真展圖今日妙通神  
願求江水發源處同作乘風破浪人

東坡雪堂圖詩

有序

蘇文忠公以元豐三年謫黃州初居定惠寺遷  
臨臯亭四年請故營地爲東坡五年築雪堂以  
雪中落成因繪雪於四壁自書其榜曰東坡雪  
堂六年四月量移汝州遂以付郡人潘邠老及  
其弟大觀蓋居此僅年餘耳集中有雪堂記畱  
別雪堂滿庭芳詞獨無此詩道光七年丁亥十  
二月十九日京師大雪置酒九里梅花村舍爲

公稱壽補作東坡雪堂詩屬張茶農解元繪圖  
以紀同人和之座客爲會賓谷中丞盧容庵太  
僕陳碩士閣學李春湖副憲顧南雅學士周雪  
橋編修期而不至郭蘭石編修張詩船舍人也

世法變幻如浮雲先生胸次無一塵黃州暫寄數椽屋  
江山萬古常清新水驛遷居辭定惠東坡再乞寬閒地  
刈草明年蓋此堂醉墨狂書擘窠字四壁空濛畫意成  
西山積雪對崢嶸來尋折葦枯荷路

見贈孔毅甫詩

待聽摧簷

瀉竹聲

用雪後宿乾明寺詩中句皆黃州近作也

邊帥窮兵民力竭朝廷猶

恃青苗法瓊樓迴望太高寒赤壁重游定悽絕大江東

去鶴南飛一笛新聲入翠微夜深燈火西窗出想見臨  
臯策杖歸憂患卅年無不有詞壇豈料崇身後瓣香遙  
溯聚星堂吾輩同斟生日酒海東私淑又名家盛事流  
傳徧使嗟慙愧蘇齋容配食一龕供養有梅花

朝鮮金西堂尙

書申紫霞侍郎值公生日祀於梅龕旁掛單谿師小像以拙集爲供殊可愧也

白小山少宰寓園牡丹盛開招飲花下余復與李

春湖少空邀同潘芝軒總憲湯敦夫宗伯顧緘

石少農杜石樵少宰賈東畚少馬吳霽峰中丞

小集卽席賦呈

先生日對富貴花此心超然忘富貴一庭風露發奇香

花裏開尊容我輩吳生霜雪已盈顛冷眼看花四十年  
當日名園多換主幾家芳草半成烟此花移植吾宗手  
淪齋殿撰根柢蟠深枝葉秀春風管領又先生始識栽培天  
意厚萬重錦繡擁樓臺勝賞連朝許共陪輸與香山老  
居士能銷艷福是仙才

送朱虹舫同年督學江蘇

聖朝造士有專責督學任重侔封圻上與國家植楨  
幹下使風俗能轉移江左人才海內冠特簡碩彥  
爲宗師

宸翰注名君第一寵膺使節辭

丹墀此邦前輩遂經

術惠定宇逮錢辛楣三泖漁莊徧衣鉢遂用樸學兼鴻  
詞場屋之業技雖小因文見道粗可窺揣摩塗飾弋科  
第此才未足占英奇使者觀書眼如月妙以義法收鑑  
鍾衡鑒所臨異寶出鐵網網盡珊瑚枝東南財賦昔共  
推漕運河餉今不支賴有疆臣撫綏善吏甘飲水民扶  
犁君又助之士氣培絃歌比戶敦書詩六經經世有根  
柢始信政教非兩歧我欲聞道嗟已遲又無實用能匡  
時雲龍卅載常追隨別緒未免酸心脾一官異日手板  
持自立敢問階崇卑寒士平生悉民隱願因講學求良  
規

書朱韞山司馬守濬日記後

勁旅三千同一膽賊肉雖腥猶可啗爲民爲國忘其身壯士游移腐儒敢腐儒平日豈知兵智勇偏從義憤生天以盤根占利器眾能協力卽堅城山城當日攻圍苦危梯躡雲囊負土霹靂橫空砲石飛賊鋒一挫氣先沮固守十日天兵來戈馬歡騰破陣廻特蒙手詔褒循吏方信書生有將才功成一笑歸田里久薄封侯如敝屣花縣重來奉板輿刻章交薦朝

天子似聞側席

獎前勲辦賊原無畛域分卽看鯨鯢

收一網

君追鄉境巨盜於城濠中以網擒之

依然熊虎領三軍吾儕忠孝

爲根柢班馬文章緒餘耳不將四海切痼瘕安取三冬  
是文史 聖朝治化被八荒何物小醜思跳梁斬伐  
尅期用威猛善後撫輯須循良君才盤盤宜大用萬里  
驂騑看一縱我今老矣壯心灰髀肉摩挲有餘痛酒酣  
拔劍忽高歌意氣逢君感激多凌烟異日瞻圖畫可憶  
書聲在薜蘿

張茶農明府槐根小築圖

綠陰如蓋亭午圓老槐一樹高插天斜陽細雨飄風蟬  
落花簌簌黃可憐萬卷之書屋數椽坐卧其下今十年  
才名三絕誇鄭虔舉家供養惟雲烟室有病婦相纏縣



女侍湯藥兒丹鉛故鄉豈乏佳林泉欲求歸養嗟無田  
一行作吏琴裝始鴻爪雪泥猶戀此酒酣潑墨神來矣  
妙以詩禪參畫理白頭我亦淹人海茅舍竹籬苦卑隘  
梅花萬樹月三更詩夢只尋香世界君昨爲寫富春山  
傳徧三韓百濟間結鄰何日酬初願雪地花天恣往還

送許玉年出宰環縣

許子筮仕初廼得古岩邑風沙捲薊門嚴裝告行急自  
言生越西湖山幽賞愜邊城雖壯游水土非素習此地  
況窮荒十室九貧乏西師方凱旋所至費供給莽莽山  
萬重徑策單騎入痼瘵豈不懷咨詢難驟及士也敦詩

書農亦念簞笠何以惠吾民俾各安其業所幸大吏賢  
經濟富韓匹持循有良規上安下俱輯君家伯與仲奉  
使踵相接謂青士遙知棠棣碑復繼洛州立我衰百無  
用古義尙能執願以官誠詩附編花萼集

### 黃愛廬吏部羅浮仙蝶圖

瑤繭攜來眾香國吹出鮑姑裙五色仙心昨夜憶羅浮  
萬里春風留不得黃龍洞口瀑雲遮四百奇峯何處家  
明月前身吾省識夢中騎汝看梅花余舊有夢騎羅浮  
仙蝶看梅花歌

吳醉生水部聽琴圖

圖中彈琴者爲君姬人  
姚氏雪初字曰翠濤

吾宗季重才誰匹家世彈琴推第一聘得名姬字翠濤

冰雪聰明蕙蘭質金閨眷屬總神仙古調中州與細傳

赤因朱近調原易青比藍深出更妍

翠濤學琴於君甥女元氏小桂小杜

學於其母桂林夫人君女兒也

嫩晴天氣開林榭玉軫橫床紫藤亞春

蔥十指卷還舒攬醪深愉態閒暇簾鉤初挂曉風和萬

葉千花照綺羅新綠染來衣露溼落紅飛上鬢雲多一

彈再鼓神來矣妙處非絃亦非指仙心窈窕入瀟湘涼

月三更化秋水刺船人去海天青繁響爭琶四座傾老

夫詩法參琴理願就蛾眉寫正聲

事見君弟紅生舍人及其姬秋紫詞註

陳鍾溪少寇贄書圖哲嗣服紵大令屬題

陳公持衡二十載還朝惟載書連車諸生以此代羔雁

遂令萬卷歸籤廚宋元精槧不易得縹緗什襲何爲乎  
或有善本出藏棄差喜校刊無魯魚我知公意不在此  
造士有法防異趨要使羣英厚根柢先以六籍充膏腴  
但誇清節見猶小實用經世謀非迂玉堂至今衣鉢盛  
人才早爲 天家儲我生與公同丙戌位業霄壤嗟

懸殊平生交誼篤金石文章餘事尋歡娛京朝一別不

復見知己難求吾道孤山房寂寞扃白石舊游愴惻經

黃壚賢哉有子繼家學依然祿養迎慈輿臨歧出此乞

加墨開卷衰淚如連珠卷中三絕天下無翁師覃谿先生題

句汪子

澣雲侍御

圖雲初世世念先澤願守青箱資楷模

送鍾仰山少寇黃樹齋編修典試江南

人才盛江左不獨在科第其學有淵源文以經術貴珠  
璧懷夜光山川識奇氣持衡必鉅公所得並佳士侍郎  
中朝彥文章兼幹濟掄才有真鑒惜哉未一試此行  
荷殊恩庶幾酬夙志願於場屋中預求公輔器

翰林吾鄉秀曾入廬山來竊聞五老語謂挾飛仙才同  
游幾少年望君隔蓬萊一膺特達知使星耀中台

燒尾魚固樂入爨桐可哀辛苦念疇昔隻字三低徊撤  
棘有餘暇江山媚銜杯請看玉筍枝參天皆手栽

涵秋閣爲野雲作

秋光萬頃涵高閣楊柳荻蒲青漠漠飽看西山四十年  
何必壯游誇五嶽課兒書熟掩柴關我輩論心日往還  
杖履飄然烟水外此翁真似白鷗閒

養園圖題寄周素夫廣州

萬鍾之祿素餐恥不及循陔一杯水故鄉雖好歸無家  
不及寄園千樹花木棉十丈紅過屋荔支飽噉增城綠  
東坡也是可憐人但住嶺南心已足風襟一判今七春  
宦味京朝劇苦辛開械昨日三太息此樂人生非易得  
願翁百歲常歡娛願子傳經領鳳雛旨甘粗給林泉美  
我亦移家入畫圖

嘉慶九年甲子秋潘芝軒先生以少司農典試浙江詩題用東坡試院煎茶故事監臨爲前中丞阮雲臺先生首唱以詩先生及副主考盧南石先生繼之監試同考官皆有和作彙錄成卷卷中皆試帖體命余賦五言古詩二章謹書於後

宋熙寧五年杭州秋榜出主司嗟何人姓名久湮沒東坡曠古才乃爲監試屈煎茶亦偶然韻事播篇什後公七百年使者湛經術五字擅長城選題徵故實首唱有中丞隔簾濡丹筆和聲鳴盛朝同協歸昌律公昔作通守年已三十七司農尤少年遭遇古難匹至今鳳咮

堂古香流野橘詩就裊茶烟清風生兩腋

品茶有正味側媚非所賢譬諸士骨鯁救時多苦言煎  
茶有良法三沸湯始圓譬諸文字佳波瀾生自然掄才  
推此意華實須兼全正如小團月瀾以中冷泉三公儒  
者宗衡鑒無稍偏春風與霖雨泊化周九埏獨於兩浙  
地早結多生緣此事雖緒餘當繼坡公傳舊游我亦屢  
惜未從執鞭題名附簡末山水留芳鮮

摩訶禪林慈壽寺在八里莊後園有雜樹數百株  
杏花尤盛三月十一日攜室人及兒輩往觀有  
作



平生愛杏花願作探花使曲水園林碎錦坊四十九年

春夢裏

予於乾隆庚子來應京兆試嘉慶辛酉後赴春闈今始謝去

一年花謝一年

開十度公車往復來冷宦頭銜今似雪少年心事已成

灰聞道城西多古寺

國初諸老前游地三月花光紅

照天嬉春徑挈全家去是時節候逾清明萬朵千枝坼

午晴卻拋矮屋風簷苦來聽團圞笑語聲百年榮悴能

餘幾世味如紗可知矣小樓深巷雨連宵爭及放翁春

睡美此地尋芳少翠蛾偶攜天女伴維摩自憐結習銷

難盡艷雪霑衣尙覺多

太乙舟雅集圖次韻朱椒堂京兆送葉筠潭方伯

之官太原

胸次皎然無點盪袖裡新詩雲藹藹手持玉節早朝歸  
門外綠陰停鶴蓋聖主前席咨遠謨故人移樽約  
高會

兩朝俱荷恩遇殊三晉行看膏澤沛至誠所感民  
不欺寬厚有容德斯大江湖渾渾魚相忘祝君清亦防  
其太

我身已是再生日餘年無多況衰疾感君高義久銘心  
難得長吟惟抱膝一代風騷有正聲萬里神交儼同室  
花枝照眼繁艷新書卷壓床古香溢及時文燕慰羈宦

故園水木念明瑟此生無礙卽虛舟一葉飄然乘太乙  
樹梢百嚙黃鸝留雙柑斗酒幸可謀分攜未免離索感  
小集且愛園林幽八州勦望鬢邊雪百年聚散沙上鷗  
但使痼癢切懷抱須知物我皆觀游枝官許飲晉祠水  
腰笏願引嬉春舟

謝守拙道人畫梅

道人畫梅有奇筆妙處直逼王元章畫成不肯持贈我  
卻笑梅隱真踈狂老夫之狂狂欲死愛梅愛畫淪骨髓  
豪奪居然效米顛巡檐一笑吾歸矣道人畫梅千萬枝  
自詫平生無此奇別成巨幅換原畫孤根卧水花離披

二妙兼收苦難得持向梅妻問奇策換畫不許酬以詩  
萬斛寒香澆醉墨道人得詩喜破慳林下嬋娟並載還  
偕隱願移洲九里乞君重畫富春山

送韓樹屏少空致仕歸渝州

公昔官諫垣思親買歸權我以詩贖行相期在忠孝一  
別廿四年相見髮俱縞名位非所榮素心以爲寶

公持海嶠節造士拔其尤公持國大計利弊無不求  
出使勵清操入告多嘉猷故山豈不懷未敢言歸休

念臣桑榆晚念臣疾病多

聖恩許投老感激當如

何錦江水悠悠雪棧山峩峩願就栽花地

哲嗣將以還  
明府迎養

聞擊壤歌

題劉子敬策馬尋春圖兼寄尊甫金門侍郎

翁昔探花方盛年馬蹄蹀躞春風顛清望

三朝冠臺省桃李手栽皆插天翩翩膝下佳公子家學

懸知紹中壘神駿天生騏驎姿霜蹄一蹴無千里趨庭

餘暇偶嬉春萬樹酣紅照眼新卽看芳艸驕嘶地爭羨

華林校射人鹽車十載經摧折仰秣依然氣超越賞心

會有九方臯願君自愛千金骨翁今投紱歸田間我愧

衰遲贅末班歸與舜俞尋舊約烏犍同跨入廬山

李公麟有

陳舜俞騎牛入廬山圖

楊紫卿祝融峯觀日出圖

仙風吹衣雲蓋笠曉色蒼茫人獨立一九金橘鑄青天  
親見咸池騰湧出腳根七十二芙蓉奇句飛來第一峯  
衣鉢平生誰省識萬山低首拜韓公

題楊鑒泉明府抱經艸堂

川上屋數椽先公授經地山水含清芬花竹有和氣麻  
陽教授經幾年一行今作循良吏知君教養如父兄能  
化吾民皆子弟緇帙重開老學庵青燈苦憶兒時味艸  
堂我亦畫香蘇萬卷塵封讀過書兒曹未解承家學慙  
愧先生許鳳雛

送張浣秋明府之官天台

平生愛讀天台賦，仙山積翠疑無路。君今去作天台長，  
先種桃花一千樹。采藥年年洞口春，求仙也是可憐人。  
官清只啜胡麻飯，劉阮夫妻是部民。

謝佩禾青山別墅圖

采石磯邊盪舟去，六朝山色江南樹。明月扁舟宮錦袍，  
曾誦澄江最佳句。雲初幾葉溯風流，應有新篇繼北樓。  
我讓謫仙才十倍，如何相見不低頭。

潘笛生大令四梅書屋圖

故園手種四梅樹，詩榻自移花下住。春風匹馬又河陽，

爭忍搖鞭背花去結茅我愛富春山門掩澄波積翠間  
梅花九里香成海昨夢扁舟載月還

蔣再山種菜圖

節母之子爲廉吏細嚼菜根有餘味閉門未合老英雄  
自信平生少機事冷官愧我雪盈顛小別家山動十年  
從君願乞金鴉嘴歸劬青松紫芋田

蓮瓢詩意圖

六橋三竺西湖路覓醉芙蓉最深處花瓣拈來作酒瓢  
香味清酣飽風露詩夢低徊二十年遙山如黛水如烟  
浩歌竟擬凌波去一朵紅雲太乙船



竹影

種竹臨南榮綠陰愛清妙紙窗明晨曦爲寫此君照好  
風忽動影參差葉葉枝枝無定姿東坡詩意湖州畫收  
入吾家總不知

雲門六叟圖爲喬鷗村先生作卽示其孫鷺洲明  
經

鷗村先生有賢孫示我六叟圖雲門圖中一主偕五客  
骨相清奇鬢鬚白一叟上壽逾期頤手執如意鐵一枝  
平生定力山不移凌鶴年一叟胸中富韜畧萬里籌邊佐  
戎幕老去還山健於鶴鄭瀛一叟非俠亦非儒餐花飲水

緇仙書冲舉未能聊自娛高樞一叟寄託惟青琴天風海

濤寫餘音成連邈然不可尋吳一叟善書壁窠字虎卧

龍跳天所恣至今翰墨猶生氣麟是皆以道全其真唾

棄富貴如輕塵泉聲洗耳雲擁身寫入妙繪俱有神先

生家世范韓比名進士爲賢刺史甘棠遺愛綠參天一

笑抽簪卧田里達觀之樂貴知止釣游況有佳山水主

客圖成六十二辭榮歸已廿年矣我較先生長一年枝

官飄泊猶如此濟物曾無尺寸功結茅徒羨林泉美九

里桐江一櫂風乞身還約故人同梅花深處吟藤瘦團

扇憑誰畫澈翁

題唐湘漁大令風雨歸舟圖

湘山影卧湘江水一網綠雲收不起細雨斜風緩緩歸  
此翁疑是元真子桐江舊隱愧蹉跎夢裏猶聞欸乃歌  
昨夜月明搖漿去梅花千點上漁簑

豐臺看芍藥歸飲尺五莊同會賓谷家霽峯兩中  
丞潘芝軒總憲陳荔峯閣學家退旃光祿朱椒  
堂少京兆張覺庵侍講顧南雅編修戚蓉臺庶  
子查又山侍御陳子鶴吏部作

豐臺芍藥天下無園丁種花如種蔬花時剪取入城賣  
但許枝葉看扶疎吾家風雅推前輩

霽峯中丞

特爲留花供

客醉十畝瓊瑤種作田千重錦繡鋪爲地花南花北幾  
村莊花裡人家笑語香濃露侵裾紅意溼輕烟籠水綠  
陰涼寶馬鈿車喧九陌俊游誰問曼殊宅諸公肯爲看  
花來沽酒典衣吾不惜萬花管領屬詩仙此會風流繼  
昔賢祿園重話題襟舊金帶圍開四十年

周忠毅公玉印歌爲公裔孫石甫大令作

九印纍纍收逆璫隨身公祗玉一方客氏之刺久遺臭  
此印字作旃檀香當年詔獄囊沙死印亦啣冤葬塵滓  
完璧重歸六世孫一寸丹心照青史茄花委鬼

聖朝無循吏家風又剖符願乞瓊章鈐萬本斷碑爭榻

種梅圖

賓谷先生七十誕辰先期避客往遊西山歸約置

酒淨業湖觀荷爲壽

十丈花爲九仙骨詩老誕生同六月曾公兄事黃歐陽

卻比荷花先一日

文節公十二日生文忠公廿一日生廿四日爲荷花生辰公則二十三日

也醉翁詩在太白昌黎間涪翁兀傲能追攀平生大節

植忠孝身世所涉多波瀾公之遭遇乃出二公上濟時

業就容寬閒卽論詩格亦鼎立廣博彭蠡高廬山今年

自署機社子達觀早悟南華旨我欲從公讀道書杖藜

昨入西山矣潭柘幽尋經戒臺游歸花事定全開願傾

淨業湖中水持作仙人介壽杯

荷花生日鍾仰山少寇黃樹齋編修招同潘芝軒  
尙書及公子紱庭張亨甫明經集淨業湖僧舍  
有作

六月花開淨業湖年年壽酒澆百觚荷花一見亦傾倒  
此日不醉何爲乎使者江南昨持節孫枝門下森成列

仰山樹齋皆  
尙書門下士

花天借取十分涼來與先生洗煩熱先生

家本采蓮涇花滿東西兩洞庭尋常一櫂穿花去花氣  
侵人酒易醒蓬瀛再領羣仙籍咫尺恩波分太液

遠浦迴風萬葉翻高枝擎露千花坼眠鷗浴鷺共低徊

更就濃陰小泊來雲裏丹青藏島嶼水邊金碧動樓臺  
酒闌爲說平生事三轉橋邊舊游地看山曾陟雨中樓  
踏月徧尋湖上寺詩禪畫隱記同龕黃左田尙書舊爲  
余作蓮花博士第  
一圖翁覃溪師法時帆  
秦小峴諸公皆有題詠卅載清狂老尙堪鏡湖許拜山  
陰賜仍帶蓮花博士銜

### 自題香蘇山館內集圖

逸妻古所稱伯鸞追老萊佩黻非所榮耕饁殊可偕我  
性太踈拙入世亮寡諧差幸閨中人唱隨有清才婉婉  
劉令嫺原配蕙  
風宜人遺詩留玉臺聽香館名亡姬  
絲春所居能畫蘭敢  
謂鷗波儕青溪實繼之繼室蔣  
氏琴香下筆無纖埃絲桐託深

契山水宜曠懷二姬

閒閒素素

寫折枝風韻亦頗佳持此娛

素心稍紓遲暮哀我家香蘇山門臨溪水隈荒園不數畝嘉樹多手栽花時風日和紅白參差開鴛鴦泛浦潏

蛺蝶飛庭階出山今十年藩籬掩蒼苔昨夢挈家去一

權南湖迴

吾鬢已成霜六十嗟有四生兒雖不早伯仲兼叔季伯也年十七低首習時藝其才僅中人所志但科第仲也生六齡似與常兒異未讀十三經先識五千字眼大而心雄叔也方四歲弄筆鴉亂塗居然有奇氣季也玉雪嬌今冬甫周晬牙牙學語言一笑解吾意鳳雛豈不佳



豚犬亦誰懟成就難預知且復看兒戲老母昔望孫得  
一心稍慰歸養畫扁舟舊有扁舟歸養圖惜未添此輩吾生憂  
患多久矣忘富貴偕隱能種花園樂有餘味

果勇侯楊誠村將軍自西域奏凱歸以寶刀脫贈  
因與李忠毅公遺刀並藏齋中題曰雙芙蓉室  
感而作歌

天生神物必有耦用當其才俱不朽勳名蓋世兩將軍  
寶刀何幸爲吾有嗚呼李忠毅殉國黑水洋平生殺賊  
幾百萬海天出沒皆刀光公子徵詩表奇節報我手澤  
千金藏楊侯刀法今無敵鐵騎飛騰徧戈壁雪夜生擒

吐谷渾論功新泐天山石同宗太保護先侯謂時齋制軍畫

像雲臺未頭白嗚呼兩寶刀精金皆百鍊所至功必成  
退藏亦稱善九邊無事收銛鋒其氣經天猶白虹今日  
會合成雙龍延津之劍將毋同侯也愛我若昆弟謂我  
發硎終利器瀕行脫贈祝待時知已一言足流涕初心  
濟世敢全灰錯節盤根無此才一官去踐三刀夢千將  
補履真何用感君高義如呂虔惜哉吳生非壯年

徐星谿都督洗硯歌

星谿將軍吾未識文武知皆萬人敵興酣喜作擘窠書  
十丈剡藤猶恨窄將軍家住南海濱巨硯珍藏逾拱壁

隄塵一斗筆一枝香透端州水坑石將軍建節臨西湖  
座變玻璃千傾碧聞攜此硯浴春流豈有蛟龍吞膽墨  
將軍忠孝本根植刳股奉親心許國洗兵昨已瀉銀河  
磨盾不須供草檄我書運腕苦無力縱橫滿紙鴉塗黑  
願求大筆灑雲烟塵土胸中資蕩滌惜哉將軍吾未識  
補題蔣心餘先生歸舟安穩圖

先生四十歸田早奉母扁舟身未老布帆無恙溯江歸  
藏園花木皆春暉慈訓分明戒知足著述千秋況奇福  
六朝烟月承康娛有婦侍膳兒讀書湖山佳處可結廬  
浮雲富貴何爲乎

九重曠代得知己再出山原非得己一病還山終不起  
忠孝平生卽詩髓嗟我從游方少年論詩許我衣鉢傳  
一官滌倒二十年衰親就養非所便潞水秋風買歸櫂  
亦倩華君爲寫照題句昔感覃溪翁謂我至性先生同  
嗚呼人生百年耳百年幾日爲人子縱邀身後五花封  
爭及膝前一杯水先生久矣歸道山展圖我淚先沉瀾  
故園菽水終天易宦海風波到岍難

仁壽硯歌爲南雅侍講作

硯以端石背刻佛像楷書仁壽元年七月二十

日信女七娘立石琢硯者不知爲誰也

浮生擾擾吁可憐欲求解脫無真詮先生學道得三昧

文章書畫皆通禪一硯摩挲古香發其陰法相誰手鑄  
七娘立石稱信女有隋仁壽初紀年揚州異日錦帆出  
萬家膏血流成川六宮貴寵不自保何況殿腳人三千  
我佛慈悲救諸苦此劫可避然不然吾儕幸生堯

舜代物性暢遂民安全冷官無事竊清俸杖頭且挂游

山錢

君與余皆游西山歸

先生督學歸自滇用此草疏曾格天

兩朝恩重誓圖報尋常富貴真雲烟嗟我散才世所

捐但以翰墨爲因緣雞林有客愛我偏一龕供養梅花

田若將紫玉雕詩佛應勝黃金鑄浪仙

申紫霞金西堂以梅龕供余稱

爲詩佛惜未刻小像于硯背耳

八月十一日會賓谷中丞邀游西山次韻同作

十載辭家山林泉隔幽賞高秋暢遐覲西來挹朝爽此  
山吾故人前踪猶怊恍茶烟裊禪榻經聲出深幌曾公  
學道人勝游約偕往暫辭擾擾緣已入非非想名利閱  
五朝澄潭俯千丈心空佛可參境奇

天所獎

潭

寺

祖賜名岫雲

聖

願攜筇竹枝浩歌踏雲上

十二日宿潭柘寺十三日觀龍潭十四日登戒臺

千佛閣渡渾河而歸

寶珠

峯

擊出天當中九朵環抱青芙蓉洞口日日爲雲

封不知撥雲徑可通俊游昔與四子同

法時帆學士謝香泉侍御

襄員外趙象庵舍人

寺門先識偃蓋松二十三年一彈指再來何

幸追南豐銀杏孫枝已千尺吳生老矣今成翁

老龍徙宅歸神淵泉脉四達山爲穿循厓落礪何蜿蜒  
杯流九曲亭陰圓盆沼誰家清可憐小窗叢篠矜幽妍  
萬竿綠玉修于椽風雨晝夜聲潺潺我來看竹兼聽泉  
請以琴理參詩禪

延清閣高俯林樾夜色蒼茫月初出須臾騰湧上蓮花  
峯名照耀都成白銀闕其下千峯雲出沒人海沈沈安可  
說三更以後纖翳無萬里清光鑒毫髮嗚呼澈翁今始  
澈吾心湛然一明月

晨曦東上林烟消羣山奔赴如海潮極樂峯轉青松梢  
戒臺百尺高岩堯一閣橫絕凌紫霄憑闌目縱千里遙  
地瀉長河遶衣帶天低大漠盤神雕下方車馬嗟太勞  
塵昏不見盧溝橋

壇前九龍松最奇鐵幹五朝誰手種一龍卧地一騰天  
兩龍掉尾勢尤縱其一旁枝不敢搖鱗甲渾身森欲動  
廣廈峩峩待梁棟誰云才大難爲用託根幸爲千佛供  
不然老死終巖洞

遠山近山俱有情雲往雲來爭送迎渾河一雨新漲平  
亂流奔注田縱橫迴望西峯開晚晴浮嵐積翠不可名



月出今宵知更清大千世界同光明卻尋詩夢入山寺  
猶作松風瀑水聲

浮青山館圖爲鍾仰山侍郎作

浮青山館者鍾仰山侍郎爲追懷尊

甫耐庵年丈而作也公舊官寧遠州牧有惠政君爲陪都禮部侍郎及召還道經其地州人焚香迎送者數千人且指謂浮青山館曰此侍郎兒時寄名道院爲乞修葺而去侍郎屬朱野雲山人繪圖以紀而徵余詩余方出牧黔西其官與公同而黔又公舊治感而作此卽呈侍郎

公官瀋陽前刺史遺愛甘棠召南比明德之後有達人

乘傳重來見公子公子兒時昔居此寄名琳宮偕羽士

先生已作赤松游門下誰充青鳥使陪都今日領容

臺棣萼鳳毛皆濟美雄關出入擁旌旄父老歡迎夾城

市謂公去我四十年比戶橫經田負耒獲見公子如見  
公追溯前恩淚如水此間俎豆卽桐鄉定有精靈享牲  
醴泉味依然飲妙香山名雅合稱歡喜香水泉歡喜嶺俱在州治我  
受公知方少年公子論交等昆弟文章勲業兩無成投  
老一官行萬里黔中亦公舊所治仁風猶被佳山水詩  
人循吏古難兼一瓣心香自公始

閣師盧南石先生七十壽詩

岱岳有大雲其雨周八紘百川有源委浩浩趨東瀛間  
氣五百年公迺應運生在朝作元輔于世推耆英居近  
聖人鄉鄒魯奉典型釋褐陟三館蒞官周六卿國家

筦機務重臣領樞廷公以不次擢重望儲調羹公由鴻臚少卿

特簡軍機大臣外臺案牘繁剖決或未精公持使者節敬獄為

祥刑造士推大典致用由通經公為儒者宗掄才多幹

楨昔賢抱偉畧器量非不宏所遭未全盛其志難盡行

公事 聖天子槐鼎司鈞衡 三朝持定力一

德孚精誠為 國養元氣為民抒隱情請觀樹立偉皆

由踐履貞百僚奉模楷四海歸澄清今年季秋月 翠

華指 陪京 眷公屆七秩 寵賚先百朋 奎

文麗雲漢雅樂宣韶韻永錫東父年上應南極星粵稽

文潞公與公實同庚草詔屬東坡曠代邀殊榮蘇文忠公草九

月二十九日賜  
文潞公生日詔  
溫公再入相白頭宜弟兄公亦厚倫紀  
非獨崇勳名公子復象賢鶴陰能繼聲家學昌范韓世  
胄傳韋平下士忝門牆散才邀匠成攄懷就所見紀實  
無濫稱蒼松晚逾秀黃花寒更馨何必慕冲舉所恃惟  
神明壽愷理自致富貴安足矜願公以蕃祉霑被億兆  
氓中外被膏澤晉此期頤觥

陳登之通守集其尊甫玉方侍御殘字爲卷屬題  
侍御書名家藝林久推奉家學繼虎兒清才亦雛鳳示  
我一鉅卷題句願增重百九十六字闕文誰補空摭拾  
爲韻語天衣妙無縫手澤儼若新心魄森欲動詞藻自

雅馴孝思實沉痛嗟我忝舊交夙昔俊游共論書若論  
詩微言時一中謂當才法兼謹嚴發奇縱君師董香光  
丰神相伯仲此卷顏柳參筆堅無不洞遺墨慎弃藏硯  
几足清供後更三百年當爲天廟貢

孟冬朔日菊尊小集次韻答賓谷丈

寒花有晚香天使伴詩老世無韓魏公吾儕合傾倒開  
尊記重九花事去年早今也已餞秋開遲花益好亦如  
晚達人少豈乏才藻時至乃發舒幽貞貴先保

愛花我尤僻所慕非時名矯矯風霜中獨此能鮮明其  
格異羣卉不在葉與莖雖在華屋中而有山澤情以花

作詩骨可驗人生平嗟我兩鬢雪文采翰羣英惟能耐  
冷心與花同醉醒

十月初九日菊尊再集次賓谷芝軒兩先生唱和

詩韻奉答兼示南雅椒堂小穀西穀

讀書可忘憂種花可娛老況偕淡宕人花前一尊倒名  
花開有時不必計遲早卽事多所欣稱心卽爲好

二句集陶

高詠愛柴桑天然謝雕藻閒居味有餘無用以爲保

此花秉高節晚開兼盛名同抱歲寒姿耿耿心自明黃

白品最貴

蜜環與綠雪也

千錢購一莖其餘炫顏色未足娛高

情離根蛩語哀豈亦鳴不平西山入晚眺遙見雲英英

就花昨一醉幽禽纔喚醒

風雨近重陽佳句誦邠老子固不能詩調語堪絕倒當  
代潘與曾壇坫主盟早廿年賦同岑顧朱皆永好吾宗  
有二賢清思抒逸藻對此傲霜花清襟願長保

寒花不逞媚高士不近名相賞在標格自固惟神明皎  
月照玉杯仙露分金莖誰知中朝彥俱有物外情新詩  
互酬唱味澹音和平落葉日以多節序催元英晚香坐  
晨夕顏醉心常醒

寓園菊花盛開招同白小山少宰家霽峯中丞陶

鳧香觀察趙象庵舍人菊言光祿家瀚齋殿撰

小集卽送象庵歸易州

菊隱中書吾舊鄰酒熟花開集吾輩縱飲高歌三十年  
頭白幾人猶健在辛苦年年手植成一枝一葉一姿態  
抽簪投老歸易州大有柴桑舊風槩澈翁官冷一事無  
亦學種菊聊自娛徧詣園丁覓佳種自加灌溉培膏腴  
花時五色照盆盎環肥燕瘦皆名姝妙於蒼巖出奇麗  
能以格韻爲蕭疎京師唐花聲價重早開先謝如春夢  
只有此花禁久看百日山齋足清供今年重九花始胎  
直到冬深爛漫開故人肯踐看花約圍坐還傾寒夜杯  
人海雲萍分手易明年種菊知何地打門霜葉不知寒



花影滿身同一醉

十一月唐花已出晚菊尙開賓谷丈有詩見貽次

韻奉答

黃花餞九秋爛漫已冬至沍露有佳色傲霜負奇氣唐  
花爭早開盆盎並羅致綠梅與水仙就中差可貴牡丹  
傾國姿吾儕許平視上壽享清名終讓此君異公詩寄  
託深吐詞轉和易嗟我晚無成自知非大器小草今出  
山移根託邊地永懷東籬人孤芳邈塵世

蔡友石觀察屬題其尊甫鏡堂年丈探梅遺照

隨園花開七百樹當日吳生探梅處公家亦近小蒼山

惜未親扶筇杖去冷豔踈香四十年月明曾照古癯仙  
郎君官貴開東閣合種寒花作墓田

文信國公書陶靖節詩墨蹟爲東川駕部作

元亮故天人其詩有元氣采菊見南山蕭然託高寄公  
兼將相才初心在經世不幸宗社遷萬死求一濟平生  
愛集杜憂國共深契持比靖節翁出處疑互異何爲錄  
此詩豈有耦耕意文孫持示予論古發長喟元祐宋忠  
臣義熙晉貞士身世殊邈然性情迺俱摯彭澤無寸權  
乞食苦憔悴甲子年一編滄桑萬行淚公矢報國心生  
受及門祭慷慨戰空坑從容赴柴市殺身固成仁沉冥

亦高義大節古今符妙墨連城貴吾祖

新溪先生

贊戎幕勤

王實同志卻聘有遺書事亦柴桑繼展卷誦前芬題名  
附賢裔請攜玉帶生並錄桃源記

香蘇山館古體詩鈔卷十五終

香蘇山館古體詩鈔卷十六

東鄉 吳嵩梁 蘭雪

王文成公家書謝蘇潭中丞所贈今三十餘年矣  
翁覃溪師趙味辛刺史舊有題識許滇生侍講  
督學黔中爲刻石置公祠堂余擢黔西州牧以  
真蹟見還并貽搨本會賓谷中丞李芝齡少農  
各賦七言古詩余亦同作

臣能憂國子養志忠孝纏綿感流涕一紙居然抵萬金  
此是陽明手書字粵稽正德之七年劉瑾始除政猶敝  
公雖內召爲省郎折獄驗封皆小試太宰拔絃方家居

夜雨連床愴予季書成京邸寄武林情事周詳語沉摯  
上稱翁年已古稀望以達觀遺世累湖山佳處偕故人  
侍膳慈幃娛百歲下言子弟質性殊毋徇時名爭薄技  
講明涵養有真得培植庶幾成德器中間感憤及家國  
纔諂傾朝羣盜恣九重法駕愛盤游四海蒼生憫瘡痍  
是時宸濠禍未發桑土綢繆公早計南贛迴軍破豫章  
閩粵蕩平摧朽易平生道德本良知蓋世功名特餘緒  
鄒魯從來得正傳朱陸何曾判同異攬勝我昔登廬山  
見公妙蹟東林寺紀功石刻又開先萬古磨厓有真氣  
此本珍藏三十年筆法謹嚴尤可貴使節攜從萬里回

碑泐祠堂附題識嗚呼黔中古荒服文物聲名天所祕  
自公謫宦來龍場講學蒸蒸化庠序至今俎豆流馨香  
風俗敦龐稱易治始知官秩無崇卑道在期於物有濟  
我慙陋習攻詞章才拙敢希救時吏憂患餘生動忍多  
願誦遺書迪多士

題吳荷屋方伯歸省第三集

風雅有正聲忠孝卽詩祖所尙非才華其源出肺腑束  
髮誦聖賢惓懷在君父性行苟不敦勲名亮無補遐哉  
古詩人王事感靡盬結念在循陔勞歌傳集桐奈何熱  
中輩區區戀簪組養志旣未能奪情更焉取吾宗老方

伯大義昭出處居家事溫清報國備文武疇昔畫錦歸  
壽觴晉王母五世萃一堂

九重錫多祜以此博翁歡萊衣隨抃舞重闈失慈蔭高  
堂茹荼苦旄節豈不榮頻年嗟陟岵遂以明發懷飛章  
達朝宁峩峩金筑峩渺渺珠江潏臣心紆暫歸

君恩邁前古翳余本少孤白雲望何許三復紀事詩霑  
襟淚如雨

臣仕三十年幸爲有父身父年將八十念臣良苦辛臣  
有小弱弟黽勉依晨昏乞養沮常格拜疏仍逡巡烏私  
荷

天鑒錫類推

至仁一朝沛 丹綽萬里回陽春臣家阻黔粵道遠天  
苦寒嚴程踐冰雪歸夢馳颺輪間關閱邊塞咫尺違里  
門慈顏苦暫隔歲酒難爲溫首春拜堂下歡聲動比鄰  
臣父握臣手一笑睂已伸上感

聖恩渥下恤行役勤久病占勿藥驟起如有神團藥侍  
馨膳杖履周家園花木有和氣魚鳥皆情親迢迢七千  
里依依十二旬父身幸康強臣職當蕃宣矢言答高厚  
富貴非所論

下士從公游念自蘇齋始石田參畫禪蓮洋証詩髓吾



師歸道山中外各殊軌會合苦不常樹立公奇偉黔南  
古蠻荒威惠賴兼美種橡育窮黎傳經迪多士聞公乞  
假時攀轅涕不已吏治久益醑民情厚如此前年公再  
來入觀

天顏喜垂詢首椿庭啣

恩軼倫比訪公蕭寺中論詩必移晷雄鼻恣神力纏綿  
測風旨嶺南盛壇坫幾人執牛耳謂公繼三家余言亮  
非侈一編昨寄貽服膺嘆觀止治閩如治黔化行可知  
矣願翁享期頤雲初介繁祉願公圖報稱勲業耀青史  
篇什祇緒餘其名俱不死教孝兼教忠千秋示臣子

良鄉旅店題壁

冷官二十年於物無少濟一麾墮百蠻去作親民吏平生心事切痼癩纔領方州鬢已斑腳絆手板風塵裏猶聽泉聲記在山

中山道中大雪寄賓谷丈

升車已浹旬碌碌厭塵塏昨夕四更天驟寒一換斬新詩世界飛霰片片風疎疎遙山近水雲模糊平田百頃銀沙鋪天清地曠纖塵無是時二月春深矣紅杏緋桃初破蕊忽然爛漫盡梅花竟似富春山九里天以妙境娛詩翁萬態一掃浮雲空聚星堂下一杯酒今日高吟

誰與同

題張芥航河督續願游六圖

公願游天台寫作圖第五星躔恰在斗牛分上有瓊樓  
連玉宇石橋一線槽溪通隔溪秀出雙芙蓉金烏夜半  
觀騰躍海氣遙侵華頂峯右軍洗墨池荒久太白書堂  
今在否爭及當時劉阮來胡麻一飯成佳耦采藥年年  
繫釣槎散人杖履有烟霞縱不飛昇願偕隱洞扉深掩  
萬桃花

公願游武夷寫作圖第六幔亭仙樂奏賓雲誰唱人間  
可哀曲罡風夜半虹橋圻同庭宴罷無消息下界曾孫

今又多茶田卻種山南北桂花香裡補中秋鐵笛橫吹  
坡上頭三十六峯華月滿萬頃白雲如水流洞天縹緲  
留仙蛻失腳茫茫下塵世我願從公讀道書鶴奴小字  
前生記

公願游鄧尉寫作圖第七春風吹綠湖上山一櫂飄然  
侵曉出梅花萬樹誰手栽半勒餘寒半早開杖藜未踏  
花深處先有奇香撲鼻來樓臺更用層霄迴風雪侵衣  
不知冷水光搖宕花連天俯鋤太湖三萬頃菖蒲潭上  
竹籬遮潭東潭西人種花一鋤明月衝寒去願結仙鄰  
此地家

公願游嚴灘寫作圖第八富春江上畫眉啼兩岸春山  
濃翠潑釣臺百尺垂綸好臨水一竿風裊裊中興諸將  
畫雲臺爭及先生高卧早十九泉通七里瀧有人煎茗  
坐船窗笑聽鄰娃櫂歌去收取鯉魚紅一雙前生公是  
釣鰲客濟海雲帆收未得閒身輸與石溪翁淺水蘆花  
容小泊

公願游峩眉寫作圖第九嘉州山水天下無大小三峩  
更奇秀八十四盤高入天山潮沸海雲鋪棉望窮高鳥  
影盡處上有古雪三千年瑤林玉筍參差起明粧絕代  
疑神女炎天銷作錦江流猶是懸厓飛瀑水平生意氣

凌九垓壯游念此常低徊卻讓故人持使節青天萬里

浩歌迴

謂程春海郭蘭石諸君

公願游輞川寫作圖第十以詩入畫畫入禪妙悟何人  
傳此筆圖中有山兼有水嶺樹潭花劇清美白鷺飛投  
烟靄中文魚弄影空明裡圖中有田兼有園雞犬桑麻  
成一村早約鄰翁鋤老圃晚歸稚子候柴門世法羈人  
頭易白平泉綠野空蕭瑟甘霖周徧作歸雲公是右丞  
我裴迪

書陶雲汀中丞撫吳集後

韓蘇奇氣少陵骨厚以性情深學術先生爲詩與政通

理能透宗事據實昨夜剪燈開巨編風雨縱橫鬼神泣  
蟠天際地萬古心振古鏢今一枝筆先生之識高于山  
能排眾議肩鉅艱先生之才大于海能納江湖入纖芥  
先生胸中有元氣長養羣生無不遂先生筆底有化工  
山川草木歸陶鎔海運飛挽輸太倉鯨波萬里馳風檣  
吳淞疏濬得良法綺陌歡呼爭荷鋪往年驅蝗兼禱冰  
盛事爭傳古未曾一德上孚 天眷注至誠所格神

依憑詩持定力有如此妙以雄深鎮浮靡忠孝平生作  
根柢卽讀其詩可知矣我亦耽吟四十年老來章句悔

雕鐫騷壇若許傳衣鉢願鑄黃金配謫仙

公新建慕李  
軒于虎邱

書陶雲汀中丞吳淞紀事詩卷

道光癸未及戊子

九重宵旰憂東吳

特詔大

吏拯民患先籌水利疏江湖太湖三萬六千頃實恃吳  
淞爲尾閭青龍白蜺就條理稻梁菱芡收官租下流一  
壅上奔潰潮汐助虐侵田廬連年蛟鰐恣暴橫中澤鴻  
雁聞哀呼黃浦或稱尋舊蹟武康或謂穿新渠議論太  
多少沉斷流亡誰與謀安居公以卓識持定力浚深改  
直眞良謨四十萬眾集畚鍤二百卅里勤爬流導源及  
委海運濟以工代賑淮民蘇七十二支達經絡萬九百  
丈消填淤

自青浦并亭渡至上海開潮壩

窮黎不忍增半算蠹役何敢



爲侵漁自冬徂春三閱月親督鑿鼓停旌旗桃花爛漫  
楊柳舒公來放水姑徐徐神移鬼推巨壩圻風檣陣馬  
洪濤驅劉河白茅次第舉百年積弊咸掃除洩宣從此  
有成效旱澇無復憂偏枯惟公救民隱憂切惟公體國  
精誠抒義在守成法通變功邁前哲宏規模投老我初  
習吏事讀書但解窺方隅一官今墮百蠻底利害亦欲  
詳區區感公訓迪及下走願公變理司鈞樞救荒治水  
特餘緒恩波所被皆膏腴扁舟昨者來具區目極導海  
羣流趨述懷紀事發高唱天氣浩浩吹菰蒲

梁茵林方伯重修滄浪亭繪圖徵詠

一亭突兀南城隈興廢于人何有哉王侯歌舞舊園墜  
翠華臨幸新樓臺遷謫一來蘇學士終古盛名專此地  
平生節槩兼文章不幸少年爲貴壻纖壬志在傾祁公  
遂使奇才中微罪鬻紙召客事尋常何至沉淪終盛世  
明月清風七百年當時只賣四萬錢聖俞永叔昔賡和  
佳辰勝地今流連長樂方伯葺祠廟附祀五百鄉名賢  
清池寬濬堪臨檻嘉樹親栽定插天並時執政多朝彥  
旬宣餘暇開壇坫對門有客擁臯比  
朱蘭坡宮贊主  
講正誼書院花  
月招邀足文讌惟公濟世勲猷偉講學程才厚根柢庶  
司受範小民康笑飲亭前一杯水十年我共蘇齋游官

閣重來雪滿頭夜郎天遠懷人苦詩夢還應踐白鷗

精忠柏歌書楊丹山大令記後

五華山中淚如霰老栢崢嶸夢曾見圓扉古廟來尋看  
撐天拄地孤根蟠生與同生死同死鐵石心腸堅若此  
賢令表章厥功偉奇才大節皆傳矣嗚呼栢何幸正氣  
有特鍾三字沈冤埋碧血千年蛻骨爲蒼龍檜也何不  
幸託名長腳翁分屍之慘此稱快遺臭遂與權奸同墓  
門有樹同瑰奇冰雪不挫朝南枝二聖可還中原復吾  
知此柏應重綠

王香湖太守紀夢圖

一龕湧現蓮花界碧海青天集幢蓋此間豈是落伽山  
中有慈悲觀自在玉闌倏忽又紅牆樓閣耀金山潑黛  
身雲入定佛光圓趺坐東西儼相對前生君住眾香國  
現宰官身傳法戒願力宏深接引多早修慧業離塵垢  
妙明心結清淨緣是想是因夢還再夢中梵響答潮音  
一百八人齊下拜八功德水七寶池無垢之身當不壞  
眾生擾擾吁可憐卽有前因多自昧憑將龍女甘露瓶  
一灑楊枝徧吳會吳生老矣聞道遲綺語平生資懺悔  
願求妙詩證華嚴身世了然無罣礙

題黃楚橋厯朝史印

秦漢以來精篆刻其法謹嚴氣雄直宋元明後技益工  
姿態有餘乏神力先生運腕惟中鋒排界依然歸妥貼  
想見精心結撰時蛟龍盤拏鬼神入前賢私印世所稀  
片石流傳珍拱璧何況千秋良史才一一姓名皆手泐  
江南山水我縱游懷古詩成誰感泣桃花凍剝芝泥香  
賴有先生傳鍊筆

成蘭生太守西湖鏡影圖

西湖千頃玻璃風湛若寶鏡磨青銅好山夾岸掃眉黛  
倒影盡入妙泉中公來只飲西湖水明察秋毫清徹底  
一竿在手魚不驚萬事如絲皆就理風日佳時鷗鷺喜

尋詩多在扁舟裏湖亭判牘有餘閒古人才大原如此  
烟波搖綠上鬚眉但見臨流照影時此水不磷亦不緇  
請爲公詠東坡詩

湯雨生參戎畫梅樓圖

伉儷皆仙才各擅生花筆畫成一幀題一詩楮墨飛騰  
香四出九里梅花江水灣移家吾願富春山誰信海東  
傳寫徧種花猶欠屋三間

湯壽民公子人日琴尊圖

全家妙解桐君語阿翁琴隱母琴趣公子清聲奏綺年  
鳳雛早爲冬郎賦我昨飲翁湖上酒惜未聞君人日琴

江山風月有今夕一曲請彈韶護音

青蓮洞

在袁州化成岩

萬朵青蓮花誰爲琢山骨花瓣忽倒開天然成洞室洞  
外有綠雲洞中無白日一穴透虛明萬態妙呼吸遙山  
與近水皆從樹間出曩哲題識多姓名半湮沒惟有愚  
山翁森然見遺筆公昔官湖西曾爲就亭集偶過化成  
岩惜未紀篇帙我行阻袁州聊以散蒸鬱美竹望千竿  
一徑循厓入誰知此洞天曠奧妙無匹不緣避暑來眞  
成交臂失行止有定數浮生何汲汲願住清涼天息心  
萬緣畢

周湘臯太守屬題楚王馬希範所鑄溪州銅柱銘

拓本

楚王紀功刻銅柱竊附新息之裔孫金人鐵馬溯前烈  
象浦迥比雲臺尊王也遭逢有天幸世膺冊命開雄藩  
五溪當日萃羣盜自恃險阻無攀援奇兵制勝扼其隘  
負隅虎遂爲窮猿投戈歆血拜稽顙願貰前罪邀新恩  
租稅常供侵叛絕皇天后土聞此言五十七載彈丸寄  
洞庭飲馬嗟何人十八學士宏臯輩亦有詞翰娛春園  
惜哉霸圖泐金石豈若王政培根原百蠻卽今被  
醲化刀耕火耨皆元元公以經術飾吏事聊借妙墨酬



清樽天策幕府茂艸合伏波祠廟靈旗翻英雄樹立在  
青史王侯富貴何足論嗚呼王侯富貴何足論

夜泊洞庭

洞庭之山插湖中洞庭之水流天外千里一氣合混茫  
七澤三湘此交匯嶽雲縹渺蒼梧陰九疑山多殊向背  
一丸積翠小于螺岳陽樓恰君山對夜深月出烟水空  
浩浩萬頃玻璃風似聞錦瑟彈湘靈哀絃古調難爲聽  
海內故人多契闊思之不見今白髮扣舷中夕歌離騷  
一枕仰卧青天高

清浪灘

千峯萬峯誰手擘拋爲怪石闌江流龍拏虎攫犀象伏  
挺若劍戟森戈矛水來驅石石抗之石爭觸水水怒飛  
浪花捲雪雷撼山我舟屈曲行其間一峽纔出峽又入  
峽勢盤紆灘響急九牛之力迴一篙性命可憐寄呼吸  
卅年人海足波瀾今日方知行路難壯游且愛佳山水  
夷險平生付達觀

### 玉屏

沅湘山水天下無妙以雄宕兼清腴晃州地僻氣象殊  
石岡土阜多頑麤玉屏路入黔江初水聲激激風徐徐  
夕陽明滅雲捲舒隔江秀出千芙蓉洞天結構疑精廬

縹緗萬卷森寶書神仙才子信有諸朱文綠字羅籤厨  
謨觴之館二酉俱人間鉛槧良區區我輩結習知未除  
名山著述聊自娛淩雲安得大手筆徑擬架此青珊瑚

萬卷書文筆  
峯皆山名

### 清谿

清谿谿水明見沙水邊岩洞皆清嘉石質絢爛成五色  
圓映皓月橫朱霞絕頂蟠根有高樹寒潭照影多奇花  
風濤萬竅互吞吐鉅響鐘鼓繁箏琶兀兀扁舟枕書卧  
搖搖百丈穿雲斜仰視炊烟出林杪定猜谷口藏人家  
塵土飽諳雪雙鬢游宦今窮天一涯不經險阻得幽勝

安知異境開荒遐

山行入鎮遠界

江行苦紆曲嶺路隨低昂一徑入蜿蜒萬峯連混茫小  
雨止復作林陰漏初陽烟嵐潑濃黛草木聞異香登眺  
豈不美筋力非昔強計程早三日先爲治騾綱念彼溯  
洄人猶在水一方

家人尚在舟中

翻羨雙白鷗高下同迴翔

飛雪巖

似雲卻非雲層巒疊嶂皆有根是石不似石霧結烟凝  
無定質一峯特立太孤峻一峯縹緲疑飛來連峯突兀  
插霄漢鰲背中斷龍門開芙蓉萬朵花含胎翠螺湧出

銀濤堆寶相示現光徘徊百怪馴伏收風雷下有清瑩  
澈底之洞壑上有自然結構之樓臺天漿地液往往滴  
甘露飲之可以羽化登蓬萊我老一官行萬里河岳壯  
游觀止矣洞天如此曾未探造物毋乃窮雕鐫惜哉人  
事太匆迫不及林泉恣游歷再來攬古兼尋詩蒼苔細  
滌陽明碑

牟珠洞

山風蕭蕭夏亦寒洞雲慘慘晝常晦絕頂一竅天窗開  
始識陰陽有分界老僧導入燒松明癡僕隨行詫神怪  
一塔鎮地推獨尊一柱擎天能不壞鐘魚金木俱辨聲

仙佛莊嚴各殊態其後諸洞更深窮泉脈潛流透山背  
不逢石燕撲人飛定有驪龍抱珠睡探勝昨入飛雲巖  
已訝神功極雕繪鋌幽鑿險今更奇始愧平生心目隘  
洞府昔聞三十六或抉天根通地肺願讀琅嬛未見書  
冥搜更出三山外

呂麗堂太守射虎歌

吾手能射虎吾心惟愛民太守與民同一身為民除害  
若有神吾民嗟何辜不幸葬虎腹一日三啞人虎罪當  
顯戮有民不救心死灰有罪不討非雄才太守一怒髮  
上植號令疾發如春雷健兒快馬飛騰出山靈助戰俟

鬼泣挺而走險追者及勁矢貫胸虎人立撲地山傾吼  
猶急斑毛離披血腥溼是時野曠霜風生白日慘慘青  
山青馬前羅拜壽酒擎萬口歡呼同一聲太守之勇勇  
如此太守之仁可知矣有害民者皆虎耳殺之安能貸  
其死前爲周處後宋均畏威懷德虎亦馴

不亦園爲中丞嵩曼士先生作

千金選花石萬金起樓臺浮雲富貴一彈指平泉繡谷  
安在哉異書貯琅嬛壯游狎河岳十洲三島庭戶間何  
必幽棲專一壑公昔本無園清苦若寒士金貂七葉世  
臣家燈火一椽註經地公今亦有園四海官爲家畧具

軒窗臨水石飄然城市有烟霞豈不愛湖山仁智可託  
身心閒豈不藝花竹培養人才卽嘉木公亦有翫賞公  
亦有唱酬鳶飛魚躍適其性光風霽月從公游莫謂公  
園大五畝以外寬無多莫謂公園小天地萬物皆包羅  
吾儕園中小艸耳長養生成亦如此公於萬物無所私  
常與斯園作主持

陳達莊太守惜駿圖

五花汗血八尺龍雙蹄一蹴萬里風房星下謫光熊熊  
伯樂不遇技亦窮陳公愛才性命同心賞安得白玉驄  
駕馭有法飼亦豐感恩宣力真英雄名駒天下聞烏蒙



驀山越澗如騰空，千金不惜買駿骨。百戰可使收奇功，  
西域小醜方跳梁。奉命督師先二楊，謂時齋制府得誠村提督  
此神勇資騰驤。烽烟淨掃天威章，我愧駑駘今老矣。  
伏櫪何能報知己，鹽車困躓有天才。願公剪拂風塵裏。

雪中登謫仙樓放歌

樓在遵義府

我入匡廬山，曾上先生讀書臺。名山頭白不歸卧，雲中  
五老爭疑猜我過。濟寧州曾眺先生之酒樓，嶽色河聲  
在窗戶。痛飲能銷萬古愁，吳下新軒開幕李。陶雲汀制府新建  
朱闌窈窕臨春水，四賢把臂定歡呼。杜工部白太錦袍

傳蘇學士

明月扁舟裏先生才大空古今忠愛平生許國深同推  
賀監爲知己爭及汾陽識此心夜郎之謫非其罪不信  
名高天亦忌烏江水送別離人白田花發嬉游地錦心  
繡口天下無雲海升沉總奇遇天子調羹供奉狂貴妃  
捧硯將軍愧一從鬼國竄仙才龍池官柳應憔悴愁聽  
黃鸝百轉聲天寶宮人話遺事先生揮手辭人間碧海  
騎鯨竟不還誰知瘦馬清吟處一拳石比三神山我本  
先生詩弟子投老一官今萬里金粟前來爇瓣香山中  
猿鶴皆歡喜是日積雪連鴻濛萬山失卻青芙蓉梅花  
欲謝白逾白桃花始開紅不紅插花滿頭杯在手醉膽

翰困大於斗長歌敢繼先生後搔首問天天許否

觀太白馬上聞鶯詩碑次韻

雪晴見桃花爛漫今盈枝重來驅馬地恰及聞鶯時山  
色照梅宇茶煙縈鬢絲仙才久逾耀毋爲遷客悲

孔荃溪方伯澄臺觀海圖

觀於海者難爲水游聖門者難爲言先生尼山之裔孫  
采風所至乘輪軒婆娑洋界青無垠星在南紀臨東番  
煙波浩蕩接五虎沙線蜿蜒連七鯤天教鹿耳設奇險  
地倚澎湖爲外援逋逃昔者萃淵藪版籍今也安耕屯  
使節按部歷陬陬白鳥前導揚朱旛七百里洋水如壘

三十六島花成村蛟鱗氣馴兵不用雀鼠訟息民無冤  
惟公治理本經術卽以家學酬主恩玉尺珊瑚富  
文集絃歌所化風俗敦赤嵌樓高發清嘯混茫一氣浮  
乾坤九閩壯游我未果岱岳曾陟南天門東溟下瞰一  
杯水扶桑夜半升晴瞰海天今又展圖畫山飛水立雲  
吐吞萬古心胸自茲擴洞庭彭蠡何足論

曼士中丞以雲臺師寄贈大理石硯屏見示與覃  
溪師所藏天際烏雲詩意硯屏相同其上鐫蘇  
書蔡君謨詩二句命爲賦詩

一峯烝大雲遙嵐潑黛濃十分一峯啣落日餘霞照耀

紅半壁似雨非雨晴非晴陰陽開闔百態生詩家妙語  
偶拈出欲寫丹青無此筆誰知間氣有特鍾變化卽在  
靈山中文石天然畫人格匠心慘澹難爲工此石此畫  
不易得吾師覃溪曾鑒識偃松屏贊並珍藏虹月夜貫  
寶蘇室琅嬛山館今覲之海嶽菁華出更奇連城價重  
雙璧合一貺黔南一自怡性情所寄同淡泊除卻烟霞  
惟翰墨硯屏移置抱冲齋壓倒米顛袖中石補天鍊石  
問媧皇五色散落畱遐荒所歸得主名益昌道德經濟  
兼文章我愧碌碌無寸補介節平生心自許他山之義  
何敢忘願附一卷亦千古

送陳達莊太守移疾歸滇

浮雲富貴不可期臣心如水平天下知一肯因人詎爲累  
平生大節無磷緇公官黔中三十載地衝政劇皆優爲  
痼瘵源出性情厚吏不敢犯民不欺懷陽形勝控巴蜀  
鹽舶橫江貨充屋公來日噉鮮離支經術潛移舊風俗  
猥黑逋寇稽天誅公佐丞相飛軍書磨盾歸來陣雲凍  
花翎拂翠承恩重從此威名震百蠻化行流水令  
如山人咨邊事推方畧天以雄才濟險難誰知極盛難  
爲繼明失秋毫緣察吏臺省交章願挽畱華簪一笑公  
先投公畱原爲蒼生喜公去仁風被鄉里報國他年

建白多家學能昌有公子公歸我尙滯天涯知己真慙  
屬望奢祝公壽比唐梅樹香透龍潭萬劫花

香蘇山館古體詩鈔卷十六終

香蘇山館古體詩鈔卷十七

東鄉 吳嵩梁 蘭雪

黔西州廨有香海棠一株花時讌集其下奇艷照  
天清芬襲人劉淵材至此可以無恨矣孔荃溪  
方伯題曰香海棠巢郎蘇門觀察爲繪圖詩以  
紀之

海棠無香天亦悔舊恨一雪劉淵材水西花妙香愈妙  
萬里吾爲看花來春陰幾日花含胎繁枝嫩蕊今全開  
青天作障鋪錦繡絳雲壓樹爲樓臺清芬冉冉忽吹出  
黃蜂紫蝶俱低徊始知間氣有獨得昌州嘉種誰移栽



昨宵卧聞簷瀑瀉雨猛竊慮花成災曉粧一出艷尤絕  
紅粉未肯霑蒼苔百年此樹厚根柢豈因小挫芳華摧  
正如盤錯見奇節人事或迂天心培東坡拄杖定惠入  
放翁走馬張圍迴天人遊戲偶然耳富貴碌碌何爲哉  
歲豐民和幸無事花下且傾三百盃佳山水領眾香國  
主人可惜非仙才

梁苑種梅詩爲見亭方伯作

萬紅千紫爭春色只有寒梅負標格冬心醞釀未開前  
一雪南枝凍先坼先生愛梅有深契裴几明窗工位置  
猶嫌屈曲烏瓦盆放使蟠根吐奇氣大梁花石天下無

管領春風欠此株一經得地栽培厚瓊枝玉蕊爭芬數  
我如半枯樹僵卧幽磳底老幹着花能有幾巡簷一笑  
香風迴安得遭遇如此梅嗚呼安得遭遇如此梅

翠屏山放牛歌爲見亭方伯作

翠屏山下烟草肥爾牛何幸獲所歸前宵性命寄呼吸  
今日果腹看游嬉維惇三百嗟來思九死一生無此奇  
奏刀倖脫市屠手衣繡不爲宗廟犧當其就縛勢窮急  
一躍倉皇公解入穀鯨居然免豐鐘泥首堂前應感泣  
贖身先與擲黃金參養誰知惠更深司牧有人給芻豆  
放生此地卽桃林嗚呼一牛尙如此何況痼瘵胥赤子

四海恩推不忍心物阜民康可知矣郎公

蘇門觀察

筆妙戴

嵩比爲牛寫真大歡喜歌詞溫厚音節和詩畫流傳皆  
信史牧民我亦戒煩苛佩犢遺風漸荷蓑他年問喘留  
佳話天下知公變理多

### 洋烟行三首

黔民近罹此害作此戒之

鶯粟花包米囊子割漿熬烟詫奇美其黑如漆膩如紙  
其毒中人浹肌髓雙枕對眠一燈紫似生非生死非死  
瘦肩聳山鼻流水見者咸呼鴉片鬼富者徇欲甘比匪  
貧者貪利不知恥偷常敗壞室家燬一念之差遂如此

呼吸苟延日餘幾嗚呼生已無人理

吹烟

酖毒殺人人畏之洋烟殺人人諱之買而食者甘若飴  
種者賣者收烟泥子撒升合花連畦不耕不耨皆蕃滋  
稻田三熟麥兩歧未若此貨能居奇一朝事敗官窮治  
土田籍沒身囚羈杖以百數血肉糜窮邊荷戈路險巖  
全家哭送風悽悽死葬異域生凍飢嗚呼利之所在人  
爭馳害之所伏昏不知人已兩喪嗟已遲悔不安分勤

耕犁

種烟

種烟人課烟爲租查烟人恃官爲符一役奉檄羣役俱  
一家種烟百家逋得賄則縱否則拘黠者倖脫懦者誣

維社有鼠城有狐藉端擾害無時無嗚呼種烟有地安  
得通一州積蠹難爲除所司百密虞一疎中夜撫膺聞  
嘆吁請以盜論先擒渠瓜蔓之抄胡爲乎罪以應得毋  
濫誅示以非種嚴必鋤寓恩於法法不渝牧惟引咎民  
其蘇

查烟

題英煦齋相國卜魁詩集

人事有今昔道心無險夷前賢游跡不到處天以出塞  
昌公詩衡文公乘星使槎驛路飽看江南花封藩公秉  
天朝節歸帆曾載海東月釣樞坐筦中書堂論功皆  
可書旂常一旨因人罪難追荷戈萬里啣冰霜自分衰

年畱絕域欲酬

高厚今生畢誰知謫戍未三年

詔許從容玉門入瀕行我貺東坡集預卜

賜環

有今日安閒卽在憂患中始驗道力平生同興嶺之雲  
嫩江水隨行況有兩公子雛鳳聲清能繼美邁過當年  
亦如此龍沙遠寄又烏蠻詩卷摩挲淚未乾千秋忠孝  
承家學莫作尋常翰墨看

畱別黔西士民

束髮讀漢書慨然慕循吏謂士不虛生有才合經世召  
杜龔黃間一席容位置差勝文章家雕蟲矜小技不幸  
以詩名早應行殿試廿年甫一科卅年艱一第薇省

與槐廳豈非清要地不能主文衡不敢上封事浮沈冷  
宦中旅進復旅退下直有餘閒於物無少濟恭維 兩

賢王

定邸鄭邸

玉牒命編次書成敘微勞出領專城寄夙願求一抒發  
例驗初利遮眼皆簿書關心惟撫字誰知掣肘多內省  
增吾愧抗懷希古人拊膺但流涕

黔中古羅甸州在西一隅幅員七百里山多少田廬其  
民亦習苦土脈非膏腴暫晴卽憂旱積潦難爲疏方春  
杏花坼旌旆風徐徐循行厯阡陌誘勸開溝渠連年值  
屢豐民氣獲漸紓官糧自投櫃佃戶皆完租惟念黔興

里沃壤今爲湖十年有積欠八口無斗儲賑卹且不暇  
何忍聞追呼請豁念未能中夕增嘆吁吾俸幸不薄秋  
徵況有餘以羨補不足且復寬須臾

陽明有洞室講學傳良知龍場昔遷謫化行及蠻夷行  
經六廣河曉發畱新詩文教啓多士此地宜專祠東山  
頗清曠古柏大十圍爲公建傑閣英靈或鑑茲其下闢  
講堂授受循遺規近城負笈多遠者難追隨爰就玉屏  
山再廣精舍基開門俯流水積翠來簷楣肄業旣得所  
努力當及時深造貴有得倖進非所期典謨出經濟煌  
煌



天語垂

相國阮雲臺先生恭奉  
睿皇帝獎諭如此

文成一瓣香追

溯由吾師

稟性余苦拙名法尤未諳痼瘕切民隱利害當詳探民  
亦有父母誰不謀旨甘民亦有家室誰不資農蠶生計  
一以紂固窮百未堪苟得遂無恥亡身徇所耽訟師與  
蠹役羅織爲戈鋌哀哉骨肉親乃飼豺虎貪聽斷出有  
可疑信每半參株累常八九雪冤纔二三明德貴慎罰  
善政非空談革心恨不早執法吾滋慙

聽訟貴持平事上宜有體閭閻悅且和諍言析條理況  
乎民命關出入判生死枉縱失權衡含冤及人鬼折獄

吾屢爭盡言不知止苦衷雖可原強項究非禮臺省荷  
優容猛寬寓微旨始知大賢心公明本無滓從茲奉主  
臬因之肅綱紀疾惡嚴若仇愛民願如子所嗟精力衰  
何由報知己惟攜兩袖風自甘一杯水

蒞官逾二載初無矯矯名雖云安吏隱漸亦諳民情山

田墾益寬溝水無妄爭室家感和氣三子聞學生

州民羅國

富妻夏氏一產三男連科屆鄉舉余忝襄文衡部下領秋解庠序

多歡聲

辛卯壬辰得士周際雲李同勳等十六人余生熙懷復舉第一

一朝飛羽檄受

代辭州城士民走相告攀轅淚縱橫謂失慈父母何以  
保孩嬰謂失老經師何以求準繩嗟我官實曠自守徒

硜硜所愧乏寸效所諒惟樸誠歲暮天苦寒風雪阻前程感汝意良厚涕汗方交縈願汝士篤學願汝民力耕後來有賢牧教養當繼成

述懷上伊莘農先生時以中丞權制府

國家有重臣萬里資坐鎮庶績領專司大小用惟稱州縣官雖卑於民最親近所任苟非人蒼生誰託命公兼文武資致身事堯舜中外倚畀多始終持一正玉

亭伯相古賢相薦公因直諍奉法本無私宅心在哀敬上

邀特達知遂執外臺柄入告矢勿欺虛懷喜兼聽

大體惟克敦小節靡不慎一德旣允孚百僚咸自靖

載從公游下交擬韓孟仕學理相通夙心許同證謂我  
吏事詳先求民氣靜求治毋太速識深力乃定嗟我鶩  
鈍質兢兢服明訓利害未周知効難圖尺寸耕桑課基  
勤稂莠除欲淨雀鼠靖吾民絃歌達吾境一眚雖可原  
投閒亦吾分部民愚可矜攀轅越鄰郡節相鑒微誠謂  
足知爲政公復惠手書慰勉義兼罄謂我才有爲所用  
猶未竟謂我心無他樸誠尤可信負氣惜太高於時無  
少徇昔人志經世豈貴矜獨行委曲望成功增益須忍  
性散材辱匠斤良藥發深病慙悔汗不禁感激淚交迸  
知己出大賢去思留百姓罷斥亦爲榮量移抑何幸長

寨地苦寒生苗多暴橫控馭與撫綏方憂任難勝區區  
計資豐識與榮傭竝但求民氣和詎虞室懸磬吾師入  
綸扉名世應昌運公今繼連圻勲德久彌盛恩知荷平  
生進退守無競附託期千秋竊爲吾道慶

癸巳仲春權長寨同守畱別香海棠巢

香海棠巢花一株奇芬絕豔天下無去年花開三月尾  
壽酒團欒花亦喜今年花開二月頭驪歌未唱花先愁  
若論此花百年樹官閣往來皆暫寓若論花事年年新  
我輩當爲花主人去年爲主今爲客繞樹微聞花太息  
瀕行爲我花全開緣重看花或再來

題何夢華觀碑第一圖

吾友夢華子雅有金石癖率更與中令唐拓先後得其  
一在南昌一在濟水驛心繪兼手摹耿耿元精出蘇齋  
今褚歐中鋒運全力見此爲服膺謂君具特識新詩報  
瓊琚寫照倩名筆賴有芝山翁宋葆道先成圖第一我從  
蘇齋游卅年如昨日與君訂石交有疑必就質君昔抱  
沉疴效難奏苓朮狂喜得漢碑一笑百憂失君學故淵  
雅鑑古最詳密卽此真性情寥寥罕儔匹君今歸道山  
鳳雛守遺帙感舊書此詩夜深鬼神泣

明順德夫人領貴州宣慰使奢香墓在大定府城

北烏龍坡湮沒久矣其裔孫今訪得之將爲立

碑建祠賦詩以紀

順德夫人宣慰使大節千秋功萬里華年十四嫁通侯  
二十孀閨守孤子四十八部九郡兵一日不戢邊患生  
丹闕恭承天子詔銀匄坐鎮夫人城彼哉馬氏稱都督  
撫馭乖方恣貪酷陰謀激反殲諸羅命婦公然受廷辱  
熊羆十萬氣可吞誓死不負中朝恩贖珠同心出奇計  
奢助偕行叩九關沉冤上訴高皇帝哀感六宮亦流涕  
請誅一將定蠻天願鏟千峰作平地雪棧雲林路險巇  
白厓赤水阻重關一自龍場開九驛頓忘烏道極千盤

貞可閑家忠報國子孫世世承恩澤華袞榮褒賜姓安  
茅土從今固磐石譙國前有馮夫人石碣後有秦將軍  
蛾眉同畫籌邊策鳳綽曾邀諭祭文五百年來陵谷改  
一抔荒土嗟猶在更無華表樹嶙峋誰勒豐碑禁樵採  
馬鬣崇封整廢阡護持終賴裔孫賢修祠合近埋香地  
補種梅花作墓田

奉餞見亭先生巡撫湖北

公開黔藩未經歲公領中丞方五月一朝銜 命移  
武昌兆庶感恩惟卧轍黔中地瘠民苦貧火耨刀耕劇  
苦辛十七年徵六十畝墾荒雖勤利何有國賦所增僅



升斗不論頃畝無升科公爲請命功最多逆苗跳梁追  
往事合郡捐軀多節義公發幽潛補散亡千五百人同  
入祀至今毅魄猶生氣八萬洞屬皆生苗其性桀驁難  
爲調孝有二子節三婦涵泳 聖澤歸 天朝表  
以綽楔至行昭服公之教俗不澆鄉賢名宦例有祠劉  
公文武能兼資五千精銳破賊奇一錢不愛

當亡知大守陳及吏目徐種橡育蠶生計滋銀釵擊鼓  
蘆笙吹至誠所格民不私豈以官秩論崇卑於戲公之  
表章乃如此經世持世可知矣談藝每拔高才生俊游  
卻愛佳山水公昔館閣今封圻惟本慈母爲嚴師大節

克完在忠孝正始匪獨傳風詩平生讀書慕循吏但竊  
詩名吾亦媿未能八座侍起居偏許全家收姓字華堂  
昨日奉春觥寶墨傳觀心共傾願隨黃鶴仙人去一聽  
梅花玉笛聲

惲太夫人輓詞爲麟見亭河帥作

紅香島在三神山仙書萬卷疑琅嬛護持有女秩清貴  
偶因小謫來人間毘陵世族簪纓舊珍浦夫人毓神秀  
七襄雲錦善裁衣五色唾絨工刺繡南田六法祕傳多  
活色生香妙若何綵毫一拂萬花放盛名自此儕鷗波  
詩學平生好尤篤佳句如仙吟未足清音獨奏廢箏琶

至性感人關骨肉黃絹搜羅貴別裁詞壇領袖屬粧臺  
始知弄粉調脂手偏有雕龍繡虎才公子起家二千石  
慈竹春陰布膏澤十年守郡陟封圻惟勗承家須報國  
恭惟賢母卽女宗不獨懿範兼三從講學早修儒者業  
愛才真有大臣風昨聞簡畀南河重預敕宣防歸  
實用救時第一戒苟安慈訓追思心骨痛忠孝從今迪  
後賢卽論才藝亦堪傳焚香一誦楞伽記慧業還應證  
妙蓮

爲劉春谷太守題仇十洲八駿圖卷後有祝枝山  
書老杜驄馬行驪駒歌

相馬但取肥千金駿骨何由知畫馬但求似萬里橫行  
少真氣真蹟昔見松雪翁四蹄雷電雙耳風實父此圖  
亦其亞蹠踐天街態閒暇杜工部詩爲寫真盤空硬語  
能通神枝山腕力迴千鈞妙以逾健收縱橫劉公鑒古  
有真識得此三絕珍拱璧酒酣索我賦長句愧無虎卧  
龍跳筆烏蒙自昔多奇才驀山越澗疑飛來今也負重  
苦顛躓雨雪泥塗良可哀維公破格收奇士豈以按圖  
矜索驥飛黃一出萬馬空始知皮相無英雄

題董太孺人柏舟圖兼示哲嗣陳雪帆孝廉

陳子游吾門跌宕有奇氣名由母教成慈訓守無替爲

述母平生心力實交瘁母故名家女讀書知大義怙恃  
嗟早失祖老謹隨侍徙宅來黔中萬里一家寄慈親骨  
未歸沾衣惟血淚女紅得良值百金儲篋笥旅櫬返江  
鄉至孝動天地廿二賦于歸持家主中饋棄養痛翁姑  
每祭必流涕前室畱遺雛保愛極周至僕婢荷矜憐族  
黨服高誼廿九失所天忍死撫賢嗣慈母兼父師德行  
先文藝惟願家學昌母貽泉下愧子今舉賢書其才可  
經世非天酬母節一科豈僥致我讀誠子書字字有真  
意努力崇令名勿僅取科第此語出閨閣聞者共嗟異  
餘事及歌詩性情亦純摯供佛繡蓮花無上參妙諦定

慧固前因福德乃兼備一疏 旌門閭他年沐 榮賜  
寒閨數過從懿行粗能記爲繪柏舟圖特表共姜志吾  
詩俟採風未容慙一字

秋燈畫荻圖爲節母史楊氏作兼示荻洲秀才

母夜績兒讀書一燈小於螢照此孀與孤母績漸盈筐  
兒書亦成誦卷中之淚泉下心風雪三更守飢凍母今  
白髮兒青衫往事低徊有餘痛願母節壽登期願兒  
祿養須及時荻灰畫盡無人見一疏請 旌天下知

哀張保 全世明買張熊氏之子張保改名全有  
材賜斃誣告謝緒恒驗訊得實詩以哀之

九歲兒一斗穀賣兒價何廉僥倖逃鬼錄誰料兒命奇  
可居迺以陷人爲醜毒奇貪謀未遂虎狼病骨先教委  
溝瀆嗚呼賣兒求生生轉蹙李代桃僵一何酷早知戕  
汝禍他人餓死孃前亦爲福

李節婦詩卽書其澹靜樓詩草後

福慧難兼修節孝原一致我讀孺人詩澹靜有深味孺  
人世家女聰明本天畀八歲謁隨園投詩能強記十三  
客睂州江山助詩思十七歸樸園筆墨漸屏棄廿四邁  
閔凶吟懷益憔悴夫亡不可生一死明大義姑在不可  
死再生膺重累熒熒身未亡耿耿心不寐秋雨望江南

春風掃墓地

集中有望江南  
詞春日祭墓詩

冰雪一卷詩冰蘖十年淚

隨園女弟子其才多旖旎孺人尤清貞勁節松筠勵我  
詩法藏園闡幽責攸寄採風入新詩一一紀其事上請  
朝廷旌下補郡邑志

張節婦詩

節婦姓唐氏十八作嬪張公子公子遘疾初請期靡它  
早諒母天只傷哉卻扇甫踰年鸞鏡破飛妝臺毀素闥  
白晝哭青春一縣幽花爲出涕舅姑在堂阿叔弱未得  
聊生不得死剪髮作書貽大母兒心自盟井中水昆明  
池竭滇海枯終古波瀾誓不起含泣承歡四五年誰信



茹荼甘如薺阿叔婚匹舅姑娛還將新娣憐舊妯弱草  
輕塵何足論堪嘆人心不如始從命孰與潔身歸請見  
亡夫九泉裏嗚呼婦人從一終保已令終亦可矣自來  
節烈多苦心斷指割鼻非得已捐軀成義古所難志士  
仁人同歔唏但求守已完白璧違計姓名標青史終始  
無慚大節彰烈烈貞魂戀桑梓異鄉黃鵠昔孤飛同穴  
墓木今連理白楊雨泣風淒淒猶有餘衷傳播里

香蘇山館古體詩鈔卷十七終